

聽秋聲館詞話

聽秋聲館詞話卷十

無錫丁紹儀杏船

金壇

史梧岡教授

震林

長齋佞佛不慕榮利有耦耕書

院對

早梅洗硯喜儲玉函至浣溪紗云古樹寒鴉集復

驚北風涼透緼袍輕小塘殘水漸成冰○日色淡來花

意散雁聲孤處客愁凝那時離別此時情冬日與夢覘

入南山訪友未遇借宿村舍丁香結云犬吠疏籬雀喧

深篠漠漠水村煙墅望暮雲凝處斷雁外草色枯黃如

土連岡痕尙黑殘燎在石稜盡露柴門還有未掩破屋

茅茨新補○仙路指直北峯頭一線迂迴難度月冷霜

濃。幽人好在。定添新句。長是寒夜酒醒。更覺離情苦。待春回重見。心與梅花並吐。翛然之致雅如其人。

丹陽女史賀雙卿病瘵薄倖云依依孤影。渾似夢。憑誰喚醒。受多少。蝶嘖蜂怒。漫說炎涼無準。怪朝來。有藥難醫。淒然自整紅鑪等。總訴盡濃愁。滴殘清淚。冤煞蛾眉不省。○去過西來先午。偏放卻。更深宵永。正千回萬轉。欲眠仍起。斷鴻叫破斜陽冷。晚山如鏡。小柴扉。靜鎖悵悵。殘喘看看盡。春歸望早。只恐東風未肯。雙卿生有夙慧。嫁金壇周姓樵子家。無紙墨所爲詩詞。悉蘆葉寫之。余外祖顧筠溪公爲賦蘆葉詩二百餘言。梧岡教授西

青散記中詳述所遇並錄其浣溪紗云暖雨無情漏幾
絲牧童斜插嫩花枝。小田新麥上場時。○汲水種瓜偏
怒早。忍煙炊黍又噉遲。日長酸透軟腰肢。讀此二詞覺
道韞當年未爲不幸

有宋以來兄弟工詞者儂計數家前已言之至羯末封

胡均工協律自廬陵李子大洪子清漳子永泳子召注

子秀漸世所傳花萼集外近推山左王西樵考功士祿

阮亭尙書士正禮吉明經士禧叔子進士士祐與宜興

陳其年太史維崧弟魯望維岱半雪維崑緯雲維岳子

萬宗石然不能人人有集惟吾邑顧梁汾典籍貞觀有

彈指詞兄景行明經

景文

有匏園詞弟倚平茂才

衡文

有清琴詞堪與李氏相埒。匏園香眉亭看桂枝香云。
小山橫簇。看淡日烘雲。堆滿金粟。閑倚青紅庭院。晴飄
輕馥。深叢占斷三秋景。倒芳樽。細傾千斛。零蟬猶咽。啼
蛩乍起。晚風搖綠。○更旖旎。睡魂初足。共兔影蟾光。一
生相逐。袖滿天香。肯把翠眉微蹙。紅牙小板涼州管。且
偷翻桂枝新曲。露濃人悄。玉京吹下。向花間宿。清琴夜
行船云。飽掛輕帆。衝霧去。月初斜。未分明處。漁市燈紅。
雁汀蘆白。隔岸微茫人語。○自是扁舟鮭菜侶。甚勾回
十年情緒。繡被眠香。深杯滯酒。眞箇畫船聽雨。匏園少

日汗漫遊楚及歸父愠甚旋見楚游草中有風吹鴻雁
兼天下露滴茱萸著地開句爲之霽顏清琴詩詞擅一
時顧試輒報罷一日宴某公家見庭中病鶴卽席賦詩
四章蓋自況也詩成大哭合座傷之其一云不道昂藏
志盡灰猶能緩步踏蒼苔時從闌角穿花過還向池邊
戀食來獨立易遭群鷺妒長鳴甯似夜猿哀升沉到底
人難料失勢何嘗不是才

先祖西園瑣述云梁汾典籍弱冠遊輦下寓居蕭寺一

日扃戶出適龔文毅

鼎華

入寺答客於窗隙中見壁間

題詩有落葉滿天聲似雨關卿何事不成眠句大驚嘆

向寺僧詢姓名去稱譽於朝時納蘭相國

明珠

方官侍

郎卽延爲上客旋舉康熙五年京兆第二人官內閣典籍其寄吳漢槎塞外季子平安否二詞久已傳誦人口

孫文靖

爾準

獨舉東風野火燒出鴛鴦瓦謂爲平生第

一余謂彈指詞中美不勝舉如宿南館陶減字木蘭花云西風又起水驛更長人倦矣繡被香空一夕濃熏是夢中○鄉心久斷欲寄鄉書天樣遠爲問汀蘆有箇南飛宿雁無汴梁懷古滿江紅云何必江南堪痛哭六朝遺跡只此地曾經幾徧銅駝荊棘高浪已推臨鏡堞平沙盡沒藏書壁漫憑高歷歷數滄桑空沾臆○朱仙鎮

陳橋驛。相望處。城南北。只幽蘭軒遠。燼灰難覓。且醉金
梁橋上月。休尋綠萼堂前石。捲西風。片葉忽飛來。迎秋
笛。梳妝臺懷古。齊天樂云。卷簾依舊。西山雨。憑高暗添
愁思。馬上吟成。帳中絃歇。遺恨尙留彤史。分明故址。有
瑤島瓊花。未隨流水。惆悵重尋。繡楣金鏤。廣寒字。○當
年夢遊曾至。素娥須記得。天寶遺事。三閣傳箋。六宮潤
筆。少箇青蓮應製。茫茫對此。只銀漢紅牆。望中相似。甚
處天香。夜深飄桂子。不僅小令擅場而已。

華亭諸生林宮升

企俊

鶴招

企佩

寓園

企忠

亦俱工詞

王氏詞綜僅錄鶴招夢橫塘一闕中又訛脫數字其詞

云風吟敗葉。露捲殘蕉。滿庭無限蕭瑟。白石青溪。奈眼底都無俊物。雁語淒涼。蛩聲悲哽。夕陽西沒。怪故人不見。見了還愁。恰俱是銷魂客。○獨尋孫楚酒樓。正悲哉。秋氣悽損病骨。旅館孤燈。雖小別。動人思憶。只無那。稜稜瘦影。秋水黃花寫顏色。七發驅愁。五窮送鬼。問何時始得。宮升南歌子。云晝靜。花迎檻。宵清月入簾。香熏繡被裊微煙。好夢安排。今夜到誰邊。寓園南鄉子。云細雨近紗窗。陣陣寒風怯晚妝。珍重添香深夜語。難忘。紅豆拋殘淚幾行。○路遠隔瀟湘。雁信魚書並渺茫。無限心期何處訴。淒涼。絳蠟欺人影不雙。

番禺屈翁山

大均

國初披緇爲僧繼返初服所著道援

堂集頗近青蓮顧多觸犯本朝語嘉慶以來書禁弛其
集始行然如戊辰元日壬戌清明廣州弔古酌貪泉猛
虎行諸作幾類醉漢罵街至詠古中謂管蔡之叛爲忘
親殉國而責微箕不爲羽翼持論尤謬後人刻其集刪
之爲是集後附詞一卷遠不如詩可存者數詞而已蝶
戀花云乍見榆錢飛片片雨溼梨花珠淚無人見愁緒
宛如江水滿茫茫直與長天遠○已過清明風未轉此
處春寒何處春先暖惆悵金鑪朱火斷水沈多日無香
篆冬夜與李天生宿雁門關長亭怨慢云正燒燭雁門

高處積雪封城。凍雲迷路。添盡香煤。紫貂相擁。夜深語。
苦寒如許。誰和爾。淒涼句。一片望鄉愁。飲不醉。鑪頭駝
乳。○無處。問長城舊主。但見武靈遺墓。沙飛似箭。膾多
少。草間狐兔。欣此後。口北關南。不須峻。并州門戶。更莫
射黃麋。收拾楚弓歸去。

鳧薌宗伯守大名時。偶拈羅帳紗窗竹簾藤枕。四題倚
調成詞。一時傳和。最佳者寶坻高寄泉。齏尹繼珩時爲

孝廉。竹簾玲瓏四犯。云碎翦湘波。更軟蕩湘雲。塵夢都
洗。深院回廊。襯出綠陰陰地。花影依約難窺。垂一桁曉
妝還未。喚翠鬟。犀押遲開。心篆裊殘心字。○紫瓊額重

筠絲膩。織離愁。嫩涼如水。相思莫待西風捲。添了箇人
憔悴。料得盼月玲瓏。猶自黃昏獨倚。只畫梁栖燕。歸來
晚。重鈎起。樂城鄧樵香刺史。

祥麟

亦爲孝廉紗窗瑣窗

寒云鎖紙嫌蠅。窺櫺厭雀。綠紗新換。初籠旭日。隱約曉
妝人面。倩雙鬟。玉臺暫移。遞香偶觸花鈿顫。正獨眠乍
醒。燕歸頻睇。蝶飛猶戀。○庭院芳華晚。比地角天涯。隔
窗人遠。知心小語。爾汝許多恩怨。繡牀邊。長晝倦時。睡
絨細碎痕似染。更明朝。巧刺荷囊。默數穿針眼。桐鄉陸
費春帆中丞。

琅

時爲太守。藤枕玉漏遲。云翠圍蘿屋小。

蘭房晝靜。又過春杪。細綰青條。合伴紅蕤嬈嬈。橫倚冰

詞譜卷一百一十五

二

紋簾上。奈顰顰、鴛衾侵曉。情懊惱。玉釵旁墮。鬢雲濃繞。

○休待綠葉成陰。縱瓊瑤垂珠。未妨迴抱。捉搦移時。膩

得粉痕多少。好貯一函茉莉。正夜半、夢回香嫋。人語悄。

雙敲也曾雙笑。任邱邊袖石方伯浴禮時爲諸生羅帳

綺羅香云蕙葉銷金。蓮華蹙繡。斗帳偏宜長夏。八尺宮

羅。貼壁冷光新砑。延月白、霧縠空搖。映燈紅。水紋低瀉。

控流蘇。煙縷垂垂。文螭銜角玉鉤掛。○桃笙斜展睡覺。

最愛枕函茉莉。暗香霏麝。分付柔飈。不許吹開微罅。悵

久隔、幽夢行雲。盼重訴、合歡情話。記當日、暖撒芙蓉。男

錢相對灑。宗伯所至扶輪承蓋後官楚中刊有晚香堂

唱和詩晚香者大名郡齋額溯所自也其贈姚君春木
詩云江左風流銷歇盡東南壇坫屬何人固隱然以宏
獎自任時候官林文忠則徐桐城李方伯宗傳均喜提
唱風騷數公歿後干戈四起不暇講風雅矣

泰順林亨甫貳尹

用霖

得羅隱江東外紀殘本於遂昌

村塾中梓以行世瑞安孫藻田學士

鏘鳴

爲題金縷曲

云劫換千年矣更誰尋秋風禾黍婆留荒壘何幸零編
收爛脫不共秦灰拋棄話約略殘唐遺事逆旅空山愁
寂寞喜文章異代聯知己宵柝盡讀難已○東南保障
今猶是騫聽到臨平山外鼓鼙聲死裴僕楚娘忠俠骨

試問眼中人幾。怎得向、行間呼起。卻愛抱雲雲壑近。好商量學把漁竿理。掩書坐。幾揮涕。外紀本六卷僅存十則。所誌會稽海塘壞得禹碑巨炭餘。杭都將獵天柱山。獲角端及王彥章妾楚娘。豔而才通劍術。章死以節終事。頗新異。又誌錢氏賦役。謂自古立國者。初制無不便。民久而下吏緣法生弊。便民者皆病民矣。願持國者無輕改法。惟謹擇吏。嚴察吏可耳。隱曾說錢鏐伐梁。且有斯言。其學識可見。殆不幸以詩人名耳。

浙之江山縣。雖衝途而遠界。江間自來無講倚聲者。劉泖生太守履芬與弟玉叔上舍觀藻生長江左。始以工

詞聞泖生有鷗。夢詞蝶戀花云。幾日游蜂飛絮趁。乍見
生憐。憔悴春人鬢。過後韶華如玉蕚。天涯何處尋芳訊。
○道是愁多蛾綠損。別夢依依。雙頰添潮暈。亂捲珠簾
風有信。奈他燕子無憑準。秋感疏影云。西風起矣。問征
鴻此去。書到曾未。算不分明。輕暖輕寒。又是者般天氣。
梧桐瘦減年時影。便寫就相思誰寄。想曲闌一半愁凝。
倚了可堪重倚。○孤負青山入畫。倦妝無氣力。眉影消
翠。任爾天涯。願作扁舟。莫作無情江水。芙蓉也有三生
恨。怎怪得玉容易悴。賸宵來。悵望銀河。幾點冷螢斜墜。
玉叔洞仙歌云。雲愁雨嬾。恨舊歡難繼。欲覓藍橋路無

際。算衣香鬢影。綺夢如仙。猶記得。昔日桃枝年紀。○春
風門巷裏。便遇鈿車。無奈蕭郎已憔悴。不斷是情根。縱
懣愁根。怎懣得。情根枯死。但灑淚晨昏向吳天。願此後
當筵。更休牽繫。集有盱眙吳仲宣制府棠題詞次集中
韻。金縷曲云。華髮催人急。怎頻年。胥江一棹。荻風瑟瑟。
憶到莎廳勤課讀。回首已非疇昔。喜到眼花騰五色。二
陸雙丁爭炫映。譜雲和。共羨江郎筆。休惆悵。踞牀笛。○
飄零我是無家客。問故巢。而今安在。劫灰悽惻。猿鶴沙
蟲成幻夢。填海冤禽何益。歎窮渺。天心莫必。起舞中宵
雞臙膊。撥銅琶。嗚咽江聲濤。緘愁思。素書尺。江郎山隸

江山縣以江淹得名用之恰合制府以縣令仕江北目擊軍情勞做家復被燬故有冤禽填海起舞中宵句不數歲總督漕運保障江淮若非初意所及殆與范文穆未秉節時誓擊楫空驚俗休拊髀都生肉語後先同軌高茶庵云泖生現官江蘇玉叔故矣

永愁人集一名鵬紅吾邑龔靜照女史著春日苦雨滿庭芳云春晝淹淹春愁脈脈嬌黃媚紫都非韶華幾許九十半成違風暖水紋如縐憑闌處漫漫芳菲殘夢醒雲迷霧鎖何處覓餘暉○追思曾玩賞舊時情事珠淚頻揮漸看看成病減卻香圍又是清明過也空贏得綠

慘紅稀。如萍燕。東西飄泊。不解認人歸。女史爲明末殉
難。中書廷祥女所適。非偶。故語多悽憤。

咸豐三年間。中賊起。滇南李月樓貳尹。子馥上書言事。

邀嘉許。旋督勇百人助守仙遊。孤城無援。歿於陣。桐城

張辛田大令。用糖弔以滿江紅云。弱不勝衣。到馬上公

然殺賊。記平時。縱橫詩陣。沈酣酒國。五夜聞雞頻起舞。

一官敍鳳聊棲息。忍捩教孤注守危城。偏師北。○誰縱

虎。憑侵逼。誰脫兔。紛逃匿。騰空拳獨奮。血痕凝碧。未掃

欃槍猶裂眚。回瞻雲樹應沾臆。待哭師老父。與招魂歸

滇隤。時乃父古坡明府尙在堂也。月樓少跣馳。老宿頗

輕之然賦性慷慨善文詞卒以忠節自見傳有踏莎行
云幾陣飛花。數聲杜宇。催將春去。催人去。陌頭柳線萬
千條。可能綰得游驄住。○別恨頻添。歡期易阻。况兼一
夜沈沈雨。惱他芳草太無情。朝來綠徧天涯路。余前錄
殉難諸公詞偶遺之爲補於此

余於鍾仲山家識林君錫三

天齡

知其工爲詩時困諸

生方爲仲山權記室歲己未始與余壻胡

鑑

同舉鄉試

次年同捷南宮旋入詞林乞假歸知余輯補王氏詞綜
徒步見訪出其友劉芑川孝廉黃肖巖茂才黃笛樓上
舍詞囑爲選錄尙未知其亦工倚聲也近於聚紅榭唱

和集中讀其詞。深愧相識十年。知之未盡。特錄數闋。以誌欣矚。盤香醉春風。云宛轉青煙吐。細向風前度。不消心字博山鑪。炷炷炷。一點灰飛。半星紅逗。悄無人處。○誰掩寒燈去。漫放秋天曙。醒來微火隔熏籠。覷覷覷。漏短偏長。漏長漸短。宵分暗數。藕絲百字令云。蓮房紅落。倩并刀重把。寒冰輕翦。畢竟空靈心性好。餘緒牽來如線。弱不勝按。柔偏易折。有恨何人見。含情箇裏。綠波曾照深淺。○聞道綺席佳人。晚涼細雪。恰映纖纖腕。悵望茜衫顏色故。密縷憑誰細浣。柳絮黏來。菱絲罥處。一樣愁腸綰。纏綿無那。休論春夢長短。半臂安公子云。愁典

春衣盡。春歸還做春寒緊。聳斷雙肩。勤護惜，一番瘦損。
偏是今年。天氣無憑準。搜盡篋，半幅餘香蘊。累箇人扶
臂。熨貼幾番未穩。○宜稱。何須問。憐卿憐我心心印。較
短量長。恰好著羅衫輕襯。不礙深宵。揎袖移燈近。放四
圍。微透春風信。只子京佳話。寒夜教人忍俊。

斫劍詞爲侯官劉君芑川

家謀

作山花子云七里橫塘

半里山。山光無數翠眉彎。風亦多情吹客去。又吹還。○
殘夢如煙尋不得。沾襟多少淚痕斑。賸有舊時杯底月。
忍重看。黃君肖巖 宗彝 亦侯官人有婆娑詞步蟾宮云
風簾怕礙金釵滑。好穩步。淩波羅襪。貪看明月可中庭。

偏過了團圓十八。○簌簌街鼓如相答。早聽到雞聲雜
沓。清宵已是不成眠。更何處。鳴機軋軋。連理枝云。皓月
窗閒射。清淚如鉛瀉。圓枕冰寒。敗衾鐵冷。漫漫長夜。喚
兒曹。吹火煮新茶。當圍鑪行炙。○莫漫窺林鑪。更把重
簾下。細檢新詞。旋抽舊草。殘燈欲炷。聽秋蟲。吟到五更
天。正更籌亂打。二君詞均學辛劉。獨永福黃君笛樓經
瑤鶴山房詞宗法。草窗竹屋蝶戀花云。天氣初晴。鶯舌
膩。悄立花前。自把花鈴繫。小玉輕扶嬌不理。衫痕鬢影
春如水。○香燼熏鑪和夢倚。燕蹴箏絃。驚是梁塵墜。檻
外落紅飄盡矣。東風漾到簾兒底。經柳林。聞長相思云。

星一天。月一鞭。撲面西風吹曉煙。行行烏帽偏。○草綿綿。柳纖纖。柳外遙山餘半邊。眉痕青可憐。

閩縣劉君

勳

陳君

通祺

咸工詞。咸與錫三善。因以見示。

陳字子駒。副貢生。一斛珠。云煙傷雨愁。禁住疏疏柳。眉痕淺淡。描初就。燕子窺人。正是愁時候。○十足春魂銷去九。一分只在花前後。江南紅影枝枝瘦。不道重來。門徑還依舊。天仙子。云暮雨陰陰啼碧鷗。香靄沈沈熏綠麝。桃花易逐曉風飛。烏棲夜。珠簾鐸。九曲銀河杯底瀉。○半醉記過勾曲社。紅燭當筵看舞蔗。酒痕夢影兩模糊。冰綃帕。拋來乍。舊事重重誰與話。游絲東風齊著力。

云和雨搓成。隨雲捲出。暗逐風飄。如塵似霧。婀娜不勝
嬌。最好日華映處。低颺過。絲柳長橋。晴空裏。裊來無礙。
纖到難描。○春影盪迢迢。重簾底。有人閑坐。無聊。芳情
一縷。搖曳入層霄。倩把花魂綰定。奈韶景。又過花朝。笑
纖手。分明捉得。細看旋消。劉字贊軒著。有效顰詞同治
四年閩省補行鄉試。獲雋其詠。塵水龍吟。似有慨於時
事。而作詞云。簾前幾陣狂風。登樓一望。迷南北。濛濛驟
起。紛紛自擾。斜陽欲黑。舞榭燈昏。妝臺釵冷。模糊春色。
嘆遮來難覓。掃來仍聚。染雙鬢。誰人識。○無賴青青垂
柳。又愁痕。雨邊暗織。半黏去馬。半隨流水。銷魂行客。十

斛量愁。千重疑夢。青衫淚涇。好拂衣歸去。低徊明鏡。把
朱顏惜。又菩薩蠻云。朦朧花影空庭鎖。淒涼月照淒涼
我。且莫捲珠簾。秋風分外尖。○誰家橫玉笛。吹得霜華
白。雁信杳沈沈。愁聞斷續砧。踏莎行云。細雨疑塵。濃陰
如夢。苔痕綠透湘簾縫。杜鵑漫自怨春遲。東風力薄楊
花重。○阿閣長閑。繡衾孤擁。眉尖半鎖。心常捧。可憐芳
草徧天涯。無人知是銷魂種。閨中詞學近來較盛。筆致
新。舊應推二君。

侯官宋已舟孝廉

諡

與余胡壻

鑑

同舉已未鄉試詞與

林君錫三相伯仲寒蟬百字令云。飄蕭雙鬢。到秋來禁

得幾番臨鏡。餘恨一襟魂欲斷。舊日宮愁誰省。柳老陰
稀。槐涼影瘦。庭院淒清甚。鈿箏零落。霜風漸漸吹緊。○
空抱一點秋心。把琴絲重拂。頓添悽哽。蝶板鶯歌都歇。
絕無復年時麗景。苦調雲流。哀音雨襍。何處傳芳信。斜
陽易暝。西窗好夢應醒。杜宇金縷曲云。但勸人歸去。怪
當年。游魂渺渺。卻歸何處。一片荒涼無賴月。照徹不情
庭宇。問可似。隴雲棧樹。賸有舊愁牢落甚。向風前。月底
頻頻訴。嗟世事。太無據。○山川滿目。今非故。看多少。瓊
樓玉闕。半成塵土。莫更天津橋上去。不是燕鶯儔侶。怕
沒有。閑人聽取。且覓繁枝聊寄跡。奈朝來。又灑摧花雨。

誰省識此心苦。

仁和陳子淑女史

嘉

適余友高茶庵明經辛酉冬杭城

陷奉姑出城冀渡錢江值大雪覓舟不得攜女自沈茶庵愴悼不已念今世鮮工古文者見吳桐雲觀察

大廷

小西腴山房集峭潔似昌黎乞爲立傳並繪空江弔影圖徵詞於余自惟荒落轉乞陳叔安明府爲賦渡江雲云煙波愁不了。玉沈甚處。揮淚問馮夷。幾生修得到。共命迦陵。倉卒又分飛。冰天雪海。斷柔腸。說與誰知。惟自判。風鬟霧鬢。終古付流澌。○今時來尋江上。獨客人間。頓悲懷提起。依舊見。鄰鄰寒碧。黛影淒迷。招魂可許聽

環珮。背晚潮。遙展靈旗。還只恐。心傷城郭全非。孫凱卿

參軍

森

題詞尤佳。調寄湘月云。驚心波逝。嘆茫茫眼底。

身世如許。尙覓歡踪。奈潮水。那識孤懷酸楚。月意荒涼。

山容黯淡。不是真眉嬾。行雲安在。斷腸爭忍回顧。○嗟

念我亦飄流。一襟離恨。儘而今分取。空恨珠沈。問怨曲。

招得幽魂歸否。落日平沙。寒煙衰草。獨自和誰語。更休

凝望。舊家惟見塵霧。吾宗月媚女士

蘊琛

題三絕句末

云。幽懷淒絕。向誰論畫出愁痕。與淚痕似水。年華如夢。

境卻從何處。更招魂語。殊哽咽。女史賢而慧。遺有寫麋

樓詞。題家書後。寄外。清平樂。云。宵深倦繡。細數銅壺漏。

剔盡釭花紅似豆。人比影兒還瘦。○窗前悔種梧桐。飄
飄易感秋風。欲寫音書寄遠。天邊盼斷飛鴻。花朝踏莎
行云芳草侵階。落花辭樹。韶光一半隨流去。杏錫門巷
又清明。踏青漫約鄰家女。○旅燕初歸。流鶯欲語。垂楊
綠徧閒庭宇。二分春色一分陰。一分不定晴和雨。惜亂
後散亡祇存廿餘闕矣。

茶庵曾集近人詞得二百餘家。擬彙爲詞腋。未成遭亂
散失無存。前歲薄遊吳中。復得六十餘家。出以示余。半
爲余所未見。亟鈔入詞補。並錄其尤工者。於此吳縣王
韞齋明經。汝玉清平樂云。絲絲雨細。幾陣飄苔砌。柱礎

暗潮侵也未。做出黃梅天氣。○輕雷欲起還停。空階向晚冥冥。攔住涇雲一片。逗來幾點疏星。宜與儲麗江上

舍

憲良

夜行船云。幾日東風飛絮趁。暗星星。點他愁鬢。

好夢何曾。繁華漸歇。又是一年春盡。○客裏心情誰與問。怕明鏡對人瘦損。杜宇催歸。提壺勸飲。不是近來方寸。吳縣江韻樓

鳳笙

點絳脣云。不爲春愁。只愁人似春

將老。繁華多少。花事匆匆了。○幾疊屏山。幾折紅牆繞。憑闌眺。依依斜照。鎮日無人到。曹石甫上舍

毓秀

浪淘

沙云。深夜雨潺潺。蝴蝶門關。一燈扶影上屏山。不道牡丹開過後。還有餘寒。○香冷鵲鳩斑。心字燒殘。愁來無

計可遮攔。且向枕前尋好夢。夢好偏難。實甫弟紫荃孝

廉毓英

憶秦娥云。更初定。梧桐院落簾波靜。簾波靜。幾

分花色。幾分月影。○冰苔小立人孤另。單衣漸怯。西風

冷。西風冷。闌干一曲。記曾雙凭。秀水周存伯大令閑一

絡索云。屏葉參差垂暝。雪天門靜。錦裘空自覆華貂。偎

不暖。熏籠冷。○清夜酒寒催醒。玉釭花凝。幾聲鈿笛小

樓西。卻賸我。淒涼聽。青玉案云。杯心簾底愁無主。記舊

日。橫塘路。也有門前多少樹。纖桃倚夕。垂楊作絮。一樣

春天暮。○年華爛錦誰相誤。被海水。離魂阻。酒盡宵寒

知幾度。烏烏成角。繫繫城鼓。不是高樓雨。長洲顧上之

孝廉

榮達

春陰高陽臺云薄靄園林濃陰城郭迷離紫
姹紅媽。試問東風。妒花何事年年。鷓鴣喚醒
蘼蕪夢。又
溟濛。滯月凝煙。鎖無聊。獨客樓中。垂柳樓前。
○江南春
事休重省。怎春如人醉。只愛酣眠。淒絕青驄。
而今又駐
誰邊。熏鑪不暖。餘香潤。悄空庭。何處啼鵲。最關心。深巷
花聲。陌上花鈿。潘麝生茂才。
鍾瑞
采桑子云生憎春去
匆匆甚。慙到鶯兒。狂到蜂兒。纔到花濃杜宇啼。
○那知
秋更匆匆甚。風在楊絲。雨在蕪絲。月在桐陰只幾時。
菩
薩蠻云冰奩塵榻當年地。斷無人記當年事。賸有可憐
儂。涼偎燈影紅。○悶尋秋燕語。偏又辭巢去。暮雨下階

來斷腸花自開。吳江徐紅荃茂才

誦芬

南歌子云夢影

銷羅帳。秋容渺鏡屏。瑣窗人去悄無聲。只有寒蛩絮月

到天明。○雁字緘愁斷。蛛絲織恨成。銀河依舊向西傾。

妒煞年年有例會雙星。淩蔭周茂才

其楨

柳梢青云一

粟燈昏。雨絲風片。隔斷行雲。癡坐窗前。苦吟燭底。儘夠

銷魂。○夜深靜掩重門。只添得相思淚痕。有酒偏愁。未

秋先冷。好夢難溫。吳縣吳定甫茂才

恩熙

謁金門云涼

似水。牆角亂蛩聲碎。玉漏遲遲門靜閉。燈殘呼月替。○

猶自瘦吟窗底。秋在絲絲鬢裏。綺夢零星重記起。教人

愁不寐。錢塘張韻梅孝廉

左鉞

題西泠話別圖送高茶

庵赴吳長亭。怨慢云甚豪氣。尊前頓減。握手河梁。壓裝
書劍。小市遊塵。踏燈歌裏。正愁釀。鳳城山色。應也把。長
眉斂。一笛送離情。漸吹落。江梅千點。○追念。念湖頭艤
榜。負了碧波如鑑。松陵去好。想一路。柳花村店。試譜出。
白紵新詞。合教與。吳娘明豔。只餞別。今朝。無奈煙帆遙
颭。俱饒音餘粒外之致。

聽秋聲館詞話卷十七

無錫丁紹儀杏舫

國初睿親王攝政諸大臣謁見咸行跪禮後沿爲例華亭高謨苑太常

層雲

以爲尊無二上奏言非禮始奉

旨飭禁嗣後大臣見諸王不得引身長跪著爲令逮年羹堯爲大將軍隨營文武皆其私人復有長跪白事慢不爲禮者不久遂敗太常風節如此而所著改蟲齋詞丁當清逸殊不類其爲人如題畫淡黃柳云層湖遠碧倒浸蒼巖溼小閣圍山斜照入一片疎紅冷翠總是江南好秋色○弄殘墨閒窗正岑寂定回首認煙驛想荒

池月澹沙鷗拍。荻影蘋香舊村何處。今夜夢輕難覓。鷗
鵠留客住。云嶺雲覆。徧湘江。蠻風颭雨。哀音斷續。相對
頻啼殘晝。扁舟旅泊何處。聽到灘黑林昏。人倦後。淒涼
似此。便聲聲行得。也能行否。○還搔首。記峽響空舡。牽
船時候。和盡青猿。絕壁亂雲如繡。隔水正逢游女。拾翠
歸來。映修篁倚袖。愁聞不了。更雙銜木葉。見南飛又。按
留客住。調前後。結各九字。照屯田詞。應於第三字讀詞。
於第五字分句。微有參差。然一氣貫下。似亦無礙。

桐鄉陸定圃教授

以滿

丙申釋褐後。以知縣用。與余先

後到楚。匆匆數面。卽改教授。歸近閩邸。抄知其尙官杭。

郡並於坊中見其冷廬雜識知方以著述自娛識中自
錄乙未夏日留滯都門偕同人避暑寄園園爲趙天羽
給諫故居金縷曲云故老吟踪。臙百餘年風流歇絕。室
廬猶韻。宦隱園林。稀熱客。片席名山棲穩。溯往事殘碑
同認。手種榆枝高出屋。鬱蒼蒼。界斷紅塵境。新月上。瀉
涼影。○闌干十二通花徑。想樽邊。掀髯嘯傲。幾經閑凭。
踈地筠簾低不捲。半榻鑪煙搖暝。似前度敲詩清景。雨
過空階苔翠合。早一天秋影來疏鬢。茶夢熟。北窗枕。其
詞當不止是姑錄之以見一斑回憶當年舊友如何璜

溪太守

渭珍

周仙嶠司馬

祖衡

夏憩亭方伯

廷樾

趙靜

山中丞

德輶

毛子遇刺史

鴻順

劉西垣

鶴庚

蔡笛椽

聘

珍丁萃野

鹿壽

三明府咸以知縣需次鄂城時相遇從

今零落殆盡劉周二公咸殞寇難獨君與中丞巋然尙存第時閱卅年卽獲相見恐不復相識矣

吳江郭頻伽茂才

磨

流寓隨園將回嘉善值袁蘭村大

令所眷吳下女郎趙雙福爲易名疎香者亦將還吳卽席賦高陽臺云暗水通潮癡嵐閣雨微陰不散重城留得枯荷奈他先作秋聲清歌欲遏行雲住露春纖並坐調笙暗傷情忍把離尊和淚同傾○天涯我是飄零慣恁飛花無定相送人行見說蘭舟明朝也泊長亭門前

記取垂楊樹。只藏他。三兩秋鶯。一程程。愁水愁風。不要
人聽。又題蘭村南園春夢圖百字令云。東風何苦。只送
將春到。難留春住。落絮游絲無氣力。還自飛來飛去。白
水橋梁。紅泥亭榭。人說南園路。畫圖省識。看來已是前
度。○莫倚錦瑟筵前。楚腰掌上。年少能才語。記得些些
惆悵事。便費蠻箋無數。玉局彈碁。銅盤遞淚。此夢儂曾
作。去年今日。桃華亂落如雨。芬芳悵淒沁。心脾頻
伽。眉有白毫。自號白眉生。所著浮眉樓詞。蘅夢詞。各二
卷。語最輕雋。獨鳬蘅宗伯與余論及。乾嘉間詞人頗不
取顧盛推仁和倪米樓。稻孫謂倪詞如楓亭荔支甫向

枝頭摘下郭詞亦具荔支之形然已在一日變色二日
變味時矣米樓詞已錄王氏詞綜二集惜晚年貧困無
依竟至黃冠入道才人命塞無如米樓者

米樓著有夢隱詞楚游歸經琵琶亭長亭怨慢云又行
盡淒淒三楚倦客單衣薄游情緒縱有琵琶半生淪落
向誰語別離如此盼不到江南樹江上已秋風卻送我
揚船歸去○重住看扁舟來往嫋嫋豔歌無數青衫淚
點早吹作去聲驛亭殘雨算那日一醉成吟便贏得風流
千古認幾疊遙山還似秋娘眉嫵悲涼蒼秀直合石帚
玉田二家爲一蘭泉司寇所著紅葉村詞有歲暮米樓

自浙來訪言有漢上之行留宿山莊遠朝歸云鴉陣啼
寒正催作殘年雪意橋橫疎柳不分仙舟來艤相看一
笑還帶西泠風味長檠底訴分攜兩載舊侶天際○猶
憶塵軟東華在小閣平津新詞頻遞雲林憔悴莫話吳
城楚水老夫耄矣料此後圍鑪能幾情難已須住到玉
梅香細殆卽傲米樓體也司寇通籍後從軍西陲海擢
至刑部侍郎引年歸復掌教江浙生平愛才若渴尤以
風雅爲己任自著詩文外輯有國朝詞綜湖海詩傳
文傳等書間作小詞不廢綺語法曲獻仙音云白苧衫
輕青羅扇小約略春歸時節竹浦橫橋荻溪短棹曾經

去年離別。記款語、雲屏底。匆匆帶愁說。○遠山疊。問誰
遺。溯紅題葉。空牘取。幾點薜階印屨。細檢舊香羅。寫相
思。付與吟篋。冷院黃昏。忍更聽玉笛聲咽。伴殘燈孤榻。
只有一丸涼月。竊怪近人刊集。凡涉麗製。每多刪棄。以
自託於立言之列。得弗爲司寇哂耶。

江陰錢瑜素女史

潔

適同邑陳大令

鼎

著有蓉亭詞秋

海棠雨中花。云滿砌。溼紅嬌欲滴。似睡起。渾無氣力。看
苔蘚籠香。薜蘿擁翠。相映幽姿別。○妒煞曉霞爭豔色。
奈暮雨。絲絲如織。想腸斷西風。自憐冷落。未與春相識。
女史幼爲士司龍氏養女。故閨秀正始集。訛爲龍全潔。

大令隨宦粵西。值明季騷攘。不克歸先。贅土司家。女史其繼室。故中表也。

宋末人詞語馨旨。遠淺涉者。每視爲留連景物而已。不知其忠憤之忱。恒寓於諧聲協律中。蔣劔人茂才敦復

讀張玉田西湖春感高陽臺詞。謂玉田拳拳故國。屢見乎詞集中。多題水仙之作。此與趙子固同意。以寓其匡海之思。卽用其韻。題後云。樹老冬青。天連水碧。金牛湖上停船。去國王孫。看春不似當年。西泠老去。笙歌夢。比前番人瘦誰憐。更蕭然。布襪青鞋。獨弔荒煙。○天涯萬里無家別。聽一聲河滿。滿目山川。敗柳棲鴉。傷心落照。

堤邊。零花淡墨無多意。望瑤波。帝子空眠。掩重簾。夜夜
枝頭。泣損啼鴉。眞善會。作者意。劍人筆。耕江浙。亂後渡
江。棄家爲僧。法名妙喜。曾刊所作爲芬陀利室詞。浪淘
沙。云涼夜夢迢迢。燈影孤飄。秋心都付與芭蕉。又是一
枝梧葉下。特地魂消。○前事憶紅橋。聲咽瓊簫。畫中人
送鏡中潮。腸斷去年江北淚。流到今宵。秋蟬祝英臺近
云冷棲煙。閒吸露。仙骨脫塵土。爾許高寒。消受晚秋苦。
最憐短鬢飄蕭。西風瘦影。只薄薄。一重紗護。○感遲暮。
相將斷雁哀蛩。幽咽向人訴。齊女門前。烏柏幾株樹。分
明落葉聲淒。中郎家破。有誰和。七絃琴譜。酸音悽響不

待言愁我欲愁矣

丁酉秋余以先君子疾請急歸適松溪謝默卿觀察

元淮

令吾邑承以碎金詞譜相贈每字譜以今之四上

工尺云自姜石帚詞旁註譜中尋究而出實得古來不傳之秘余不能歌詢之善歌者則祇堪協以笙笛後質之宜泉司馬言近時所行崑腔與古歌迥殊古歌多和聲似今之高腔然與高腔又有別聲音之道與世遞遷執今樂以合古詞終不免宮淩羽替卽如井田封建學校辟舉與西北之水田秦隴之蠶桑泥古之士每以爲可行而卒不能行天時地利限之有非人力所能强者

不獨歌詞一端而已。觀察以流外官仕江左。擢廣西右江道。自著碎金詞。僅秋柳一詞。差工穩調。寄淡黃柳云。野風蕭瑟。吹老青青色。一夜郵亭寒側側。禁得幾番攀折。愁煞江頭未歸客。○任狼籍。天涯路南北。全不似錦香陌。當年手植。今如此。看意態。婆娑晚鴉成陣。難遣樓中怨笛。餘則披沙盈斛。絕少星金矣。

張子野師師令云。香鈿寶珥。拂菱花如水。學妝皆道稱時宜。粉色有天然春意。蜀綵衣裳勝未起。縱亂霞垂地。○都城池苑誇桃李。問東風何似。不須回首障清歌。辱一點小於朱蕊。正值殘英和月墜。寄此情千里。蓋爲汴

京妓李師師作秦少游亦贈以生查子云遠山眉黛長
細柳腰肢裊妝罷立春風一笑千金少○歸去鳳城中
說與青樓道看徧潁川花不似師師好後爲周美成所
眷爲賦少年游云并刀如水吳鹽勝雪纖指破新橙錦
幄初溫獸香不斷相對坐調笙○低聲問向誰行宿城
上已三更馬滑霜濃不如休去直是少人行耆舊續聞
謂記徽宗幸師師家事美成因是詞幾被譴師師聲價
鄭重可知乃劉屏山汴都記事詩云輦轂繁華事可傷
師師垂老過湖湘縷衣檀板無顏色一曲當時動帝王
是其末路此離興唐時秦娘絕相類較明之王嬋卞玉

京所遇尤不如惟子野係仁宗時人少游於哲宗初貶死藤州均去徽宗時甚遠豈宋有兩師師耶

詞家萃於一榜莫盛於嘉慶戊辰如陶鳧薌宗伯周穉

圭中丞劉芙初太史與嘉興錢星湖給諫

儀吉

陽湖趙

樹三比部

植庭

吳縣董琴南觀察

國華

錢塘屠琴塢太

守

倬

均有詞稿刊行給諫詞訪之未獲觀察詞王氏詞

綜已錄比部菩薩蠻云明金壓繡鴛鴦錦流蘇寶帳棲

香穩三五月團圓相思和夢圓○愁深眉黛淺人隔屏

山遠鈴語五更風燭殘花轉紅雪影齊天樂云冷雲一

徑飛瓊屑紛紛玉階輕駐水鏡空黏霜花低颭閣外陰

陰寒沍。荒苔故路。恐著到斜陽。便成煙霧。踪跡天涯。籠
衣消息。幾回誤。○珊珊瑤珮認取。奈相思似水。清淚遙
注。海月留痕。梨雲款夢。合稱清寒情緒。回闌曲處。看鶴
影微茫。有人延伫。暗換晴春。幾絲防做雨。太守由翰林
出。尹儀徵游。擢九江知府。中年徂謝。人共惜之。有憶少
年云。沉沉樺燭。沉沉漏箭。沉沉春雨。茅齋最清絕。是幽
篁深處。○睡鴨香消。添二炷。坐深宵。此懷誰喻。重簾且
休捲。聽悵悵琴語。柳絮長亭怨。慢云問何事。東風吹緊。
冉冉楊花。蕩搖春暝。淺水斜陽。糝糊心事。更誰省。前塵
如夢。休誤把萍踪認。禁得雨絲絲。又點上。離人雙鬢。○

不定。讓游絲罥住。黏著一重簾影。韶光漸老。渾不管。黛眉啼損。記前度。三起三眠。早添了。十分幽恨。只萬種春愁。卻笑桐綿無分。

國朝詞人輩出。然工爲南唐五季語者。無若納蘭相國明珠。

子容若侍衛所著飲水詞。於迦陵小長廬一家外。別立一幟。其古今體詩。亦溫雅本名成德。乾隆中奉

旨。改性德。登康熙十二年進士時。相國方貴。咸顧以侍衛用。趨走螭頭豹尾。閱年未四十。遽亡。後相國被彈罷黜。侍衛之墓木拱矣。往見某氏詞選錄吳興女史沈御蟬宛選夢詞。謂是侍衛妾。其菩薩蠻云。雁書蝶夢都成。

香雲窗月戶人聲悄。記得畫樓東。歸驄繫月中。○醒來
燈未滅。心事和誰說。只有舊羅裳。偷沾淚兩行。閨中有
此姬人。乃詩詞中無一語述及。味詞意頗怨抑也。

吳門園亭以蔣園爲勝。烏目山人王翬。林屋山人王存
懋。均爲繪圖。國初蔣君兆侯鑿池時。獲一石上刊繡谷
二字。遂以名園。賦百字令記其事。云小園修葺。有礙鋤
橫石。驚教扶起。洗剔土花碑字露。繡谷原來漢隸。筆勢
離奇。刀痕斑駁。古物令人喜。但無題款。不知遺自誰氏。
○多應以谷稱園。當年勝賞。似繡春光麗。興廢無常。行
樂好。老我菟裘聊寄。韻事宜傳。佳名竟借。重嵌懸崖裏。

客來休訝。古今遷變多矣。二百年來名園迭起如吳氏之拙政園。劉氏之寒碧莊。黃氏之五松園。春秋佳日。縱人遊觀。獨繡谷名最著。然蘇城士大夫。不僅以宴樂豪華相尚。如施棺送藥。育嬰放生。諸舉亦莫不爭先恐後。樂於從事。兆侯族兄。錫庵有育嬰堂成誌喜金縷曲云。千古傷心事。爲饑寒。拋兒擲女。路衢駢死。堂建吾鄉。嬰育久。狹隘何能徧濟。綿力倡。幸多同志。代泣呱呱。陳召杜。廣規模。願借元都地。眞父母。聽公議。○聿新堂構。恢條例。自此後。孩提有養。不戕生氣。仁政宜爲天下法。悉幼人之幼矣。隔天屬。暗揮悲涕。安得人人寬俯育。縱堂

開汲箇嬰兒棄。吾見此乃狂喜。自經兵燹恐已不能如
舊。故家亭榭鞠爲茂草者。更不知凡幾。聞繡谷曾關入
僞忠逆李秀成府。余乙丑旋里時。虎邱勝跡僅存千人
石。與如椎一塔而已。兆侯名垓。順治十六年會試副榜。
鐔庵名德。竣順治十八年進士。詞均庸俗。然不當以工
拙論錄之。俟有誌名園善舉者。得所考鏡。

宋時高麗來朝。賜以大晟雅樂。故高麗史樂志多錄北
宋人詞。其調多詞律所未收。語則頌美居多。間有似屯
田體者。惜余前在楚中所見。與近日大兒都中所購。均
係鈔本。訛脫不可勝計。無可校勘。如慶金枝云。莫惜金

縷衣。勸君惜少年時。花開堪折直須折。莫待折空枝。○
一朝杜宇。纔鳴後。便從此。歇芳菲。有花有酒且開眉。莫
待滿頭絲。較子野詞前後結均少一字。前段第三句不
叶韻。前質諸趙丈良甫謂折字乃以入作平。至結句與
子野詞異。當是另體。玩上下文義。並無脫字。又迎春樂
云。神州麗景春先到。看看是韶光早。園林深處東風過。
紅杏裏。鶯聲好。○漠漠青煙迷遠道。觸目是綠楊芳草。
莫惜醉重遊。逡巡又年華老。較美成西麓詞前段第三
句少一字。且不叶韻。較珠玉樂章詞後段字數多寡迥
殊。又荔子丹云。鬪巧宮妝掃翠眉。相喚折花枝。曉來深

入芳菲裏。紅香散露。浥在羅衣。○盈盈巧笑。咏新詞。舞態盡嬌姿。嫵娜文回。迎宴處。簇神仙。會赴瑤池。宋時小令。前後相同者多。乃後結獨少一字。似係訛脫。聊舉一二以概其餘。

本朝詩僧甚夥。詞僧則少。羽士詞尤罕。觀余輯詞綜補。僅得數人。桐城僧宏智字藥庵。憶秦娥云。花如雪。東風夜掃蘇堤月。蘇堤月。香銷南國。幾回圓缺。○錢塘江上潮聲歇。江邊楊柳誰攀折。誰攀折。西陵渡口。古今離別。荆溪僧超正字。方竹過廢園。江城子云。竹籬花徑小山幽。碧雲浮。澹煙收。猶記當年。歌嘯每臨流。芳草無心隨。

處綠人去也。恨悠悠。○飛來粉蝶弄輕柔。漫凝眸。上心
頭。惆悵今番。不似舊時遊。人世茫茫渾似夢。聊一枕學
莊周。吳僧果心字得源。夜聞鄰家度曲。西江月云何處
歌聲隱隱。夜深偷譜宮商。遙憐鶯舌嚙新簧。嫋嫋如絲
輕颺。○月底不堪嗚咽。風前更覺淒涼。隔牆猶自斷人
腸。何況酒邊低唱。吾邑僧明瑜字晦熙。三部樂云極目
煙汀。有幾點白蘋。幾枝紅蓼。翠盤敲側。已報藕花衰老。
夢回冰簟涼生。怎銅壺滴盡。銀屏難曉。芳期易負。又過
針樓乞巧。○試聽井梧葉墜。似西風有意。教人知道。那
更石臺蛩語。珠簾螢繞。是誰家。疎砧頻擣。慣禁受。月昏

雲梢歸雁到也。早勾起離愁多少。又吾邑明陽觀羽士
榮漣字洞泉少年遊云。荒亭自署草玄居。剝啄近來疎。
瓶養幽花。欄栽細藥。清課莫教虛。○芳叢時見蝶。蘼蘼。
竹牖夕陽餘。飯畢徐行。詩成獨立。適興飼盆魚。尙有宜
興僧。隨時江都僧。大瓊常熟僧。能印暨羽士魏瓠王。至
淳詞均平平存其人而已。王氏詞綜所錄亦不及十人。
中如宜興僧宏倫。眼兒媚云。似水官衙夜無聊。燭施水
沉消。故鄉秋老。天涯人去。明月今宵。○來朝準趁吳娘
棹。燈火過虹橋。松陵江口。估船相並。篷背吹簫。似非禪
門本色語。

會稽王笠舫明府

行梅

以嘉慶辛未進士出宰武宣未

幾罷官卒於粵著有綠雪堂詩詞綿麗不讓馮柳東大
令而筆勢尤矯健憶雪水龍吟云海南只是沉沉更無
柳絮因風起東風漸緊西風漸薄轉添暄意竹密無聲
雲鬆有縫歲云暮矣把詩人興會酒人滋味都擔閣長
空裏○遙憶江南此際正紛紛銀沙亂墜簾前紅袖燈
前白髮似嗔還喜飛舞襟情聰明心性幾曾憔悴恁天
涯悵望單單苦雨做離人淚讀吳梅村雁門尙書行滿
江紅云明季英雄孫白谷千秋健者天不管燕都亡矣
雁門破也公子纔馳襄府蠟參軍已歿潼關馬痛一般

閣部舊精魂。梅花下。○九江火紅亂灑。二王血頭當借。
算鐘鳴漏盡。酒闌燈炮。直北風高。鼙鼓急。江南月。拾笙
歌。且。賸黃河遠上客心悲。哀絃寫。

近於坊中見潑墨軒詞爲濟甯戴石坪

鑑

作春日過帶

橋浣溪紗云路轉平林一徑遙。炊煙過午未全消。短垣
幾簇露花梢。○桑圃雨晴鳩婦喜。麥疇風暖雉媒嬌。夕
陽明處水平橋。經倚虹園踏莎行云芳草盈堤。垂楊繞
岸。殷紅淺碧誰家院。游絲百尺裊斜陽。依依似逐東風
轉。○塵滿銀箏。屏閑繡扇。珠簾翠箔深深掩。畫堂春晝
靜無人。杏梁睡穩雙飛燕。二詞頗具畫意。

吳門蔣重光詞選錄郭輔堯踏莎行云珠露催涼金風
薦爽紗窗日映茱萸網輕羅扇子怕寒蛩自伊啼徹辭
儂掌○紅樹陰疎蒼葭水廣一繩雁字人人想誰知入
骨是新愁原來在在兒上輔堯里字無考末二語卽
何處合成愁離人心上秋意一經運用彌覺新穎視山
谷門裏安心女邊著子句雅俗相去霄壤

二十年前見余友錢揆初最虞美人詞云鶯魂蝶夢淒
迷甚瘦到梨雲影一番風雨一番晴。賸有薜蘿綠徧短
長亭○惜花愛傍花陰立花落人知惜惜無人惜惜花
人依舊空閨寂寞度芳春愛而錄存久不復省君旋舉

乙卯京兆試官中書以軍功擢知府乙丑春余歸省松
楸於李伯帥鴻章蘇城節署匆匆一晤擬索其詞稿未
果方謂重見有日未幾君故聞之撫然幸前詞未飽蟬
腹雖非全豹足見一斑

三餘贅筆言譙樓盡角有三弄傳爲曹子建作詞云爲
君難爲臣亦難難又難創業難守成亦難難又難起家
難保家亦難難又難南涯賈雲階明經履上取其意繪

梅花三弄圖自題齊天樂云烏烏淒響誰吹徹蒼涼試
翻殘譜片埃煙昏麗譙月淡三疊依稀如訴猶傳舊句
算萬事難難不分今古創業承家幾人能記曲中語○

昇平文武享久。甚波頽莫挽。牢破方補。列戟門深。懸鈴
閣。覓聽慣。沉沉畫鼓。誰知調苦。比吹落梅花。玉龍哀楚。
起望遙天。候蟲啼似雨。語兼規諷。詞云乎哉。

厲樊榭倚天香。調賦煙草先後和者數十家。時多縷切
爲絲。截竹木如荷。簫貯而燃吸。今所謂旱煙是也。近有
範銅爲管。儲水而吸之。有聲者。其製愈巧。品亦差別。韓
螺山中翰咏。以前調云。鏡粉銀揩。壺冰玉瑩。荷簫新樣
輸巧。束紙熏蘭。凝塵碾麝。汲取井華寒曉。玲瓏豆火。算
合就。丁壬婚好。纔把詩襟浣雪。煙霞吐吞多少。○呼童
繡囊貯早。滯人懷。半醒殘飽。昵語隔簾吹出。轆轤聲小。

幾度春黃細撚。惹淺暈檀黃透纖爪。睡地餘芬。墜煙自
裊。又有細碾爲末。貯壺中而嗅。以鼻者陳叔安明府亦
倚是調賦云。細搗還凝。輕拈欲化。氤氲竟斷斜縷。氣定
方思。心清自妙。不比尋常含吐。藍田日暖。任一握。雕瓊
密護。待與花香暗撲。茸茸漫疑霏霧。○點來料應頓悟。
味酸辛。麴生同否。可是舊耕瑤草。別縈芳緒。狂嗅風情
共許。更洛咏真成謝公趣。蘸指餘芬。從容掩住。高茶庵
明經復倚前調咏阿芙蓉云。瘦枕支愁。單衾疊恨。貪眠
不爲春倦。小盒斟霞。圓筒噴霧。度到金針偏緩。青燈味
好。恐身世。被伊拘管。隔著屏衣聽去。聲聲似聞嬌喘。○

深房夢回晝短對紅妝鬢雲鬆半還道宿醒難解柳腰
渾軟不信風懷暗減最鏡裏欺人玉容換一味懨懨壺
觴漸遠按煙草一名淡巴菰始自明末康熙初猶禁吸
食後乃盛行無論男婦貴賤嗜之幾同粟菽逮阿芙蓉
俗名鴉片煙來自外洋邊愚且因之而啟粵匪亦乘閒
繼起流毒幾徧天下噫一吸之微而禍延家國宜古人
於旨酒象箸動色相戒惜各家詞中未語及此

男承禧校字

聽秋聲館詞話卷十八

無錫丁紹儀杏舫

姚君春木嘗言其鄉人黃研北司馬仁詞甚工余覓其稿未獲僅於元和朱子鶴詞稿中見其賦謝餉蓴卽用見寄韻摸魚兒云問當年季鷹何事相思偏在秋老波光萬頃和風颭一碧暗催詩稿勞遠眺記亭倚垂虹宛轉心縈繞漁師昨報怡雉尾初齊龍髯新長風味絕塵表○蒙持贈伴以瑤華寄早纏綿如挹蘭抱鄒陳唱和圖重繪添箇采春游棹思浩渺把錦帶羹調頓許閒愁掃相逢醉倒道羊酪休提河豚未上第一露葵好次韻

極穩洵非作家不辦近讀謝厚庵司馬思忠錄又見其

弔陳蓮峰軍門

化成

戰歿吳淞口水龍吟云海天獨障

狂瀾。鳶飛欲墮愁無際。鼉梁乍駕。鶴軒何處。沙蟲爭避。
大樹思公。長城壞我。石衙填未。把純鉤欲試。唾壺頻擊。
揮難盡。英雄淚。○畢竟將軍不死。跨長鯨。敵魂猶悸。金
戈鐵甲。雲車風馬。雷霆精銳。豹苦留皮。雞羞斷尾。有如
江水。報馨香俎豆。泐峰同壽。壯乾坤氣。思忠錄內又有
陽湖湯果卿司馬

成烈

輓姚履堂大令

懷祥

殉難定海

卽題所書閣中藍筆字後水龍吟云海濤捲盡雲旗靈
風怒壓鯢鯨浪。軍餘殘戍。城懸孤島。臣心空壯。槩折駕

爲鋒擣豺虎。星先隕將。算陽侯相逼。馮夷相逐。名不與
身俱喪。○爲展當年遺翰。想霓裳。衆仙同唱。鸞翔天表。
蛟騰雲外。英姿颯爽。片紙琳瑯。故人鄭重。墨林珍賞。待
鐫華石室。行間正氣。浩然流響。陳軍門同安人。姚大令
侯官人。道光二十年。暎夷擾浙。首陷鎮海。大令投池死。
軍門與兩江制府牛鑑分守吳淞。牛先遁。軍門無援力。
戰陣亡。時浙帥中節節退避者。爲余提督步雲。後死於
法。詞中鶴軒何處。名與身喪。語均寓微詞。牛余二人咸
負盛名。時尙不敢訟言也。

吾鄉孫文靖

爾準

由翰林出守汀州。仕至浙閩總督。曾

兩渡臺陽奠安反側餘如修通志濬小西湖建義倉拓貢院皆爲之不遺餘力歿未廿年知其事者已鮮獨爲方伯時先因海氛未靖嚴海禁鄞人之賈閩木者困甚事定禁如故公請弛之至今甯波會館值公生日演劇稱祝弗替近復拓地建祠以志不忘殆非公意料所及公清節自勵歷仕三十年不益一椽身後遺書數篋亦斥賣幾盡著有泰雲堂詩文集並雕雲詞謁金門云寒側側。極目半空雲溼。雨態橫斜。煙態直。做春陰天色。○路轉垂楊巷陌。沽酒溪村南北。帘綳波痕翻未得。東風初著力。紅花埤道中。卜算子云古道驟驕驄。一望平如

砥薺麥茫茫綠未齊。春在溟濛裏。○茸帽曳輕裘。斜日
寒如水。回首江南正落花。香上紅襟嘴。又三十初度金
縷曲中云。但說文章堪報國。恐蒼蒼未盡生才意。其抱
負已見一斑。先君子嘗言文靖接僚屬藹然可親然
小有過差彈劾不稍寬行事微近乎刻故二子均無後
又言案牘中不足蔽辜四字始自吾鄉秦文恭蕙田今
後裔滅絕求降爲皂隸者亦無有矣。因憶海康陳清端
瑣年譜恭錄

聖祖諭云清官固好恐清而刻人便不能相安大哉
皇言然特爲上等人說法耳下愚則不移

大興朱竹君學士

筠

乾隆庚寅主試閩中夢武夷君見

召約以十年後往逮辛丑視學任滿入都未久以微疾

逝時學士弟石君相國方視閩學閩縣孟瓶庵吏部弔

以金縷曲云廿載蓬瀛客。駕征輶。寧帷南望山丹水碧。

一枕清宵催客夢。夢到洞天窟宅。訝雲馬。風車絡驛。九

曲峰頭虛左待。望先生。認取三生石。休忘卻。舊丹冊。○

當時執掌慵登陟。語仙靈。相期十載。不辜諾責。誰料輜

軒重莅止。到眼巖巖猶昔。曾未幾。果登仙籍。話到幔亭

張宴事。吹簫人。淒斷緱山笛。纔俯仰。總陳跡。學士性通

脫見客或不衣冠而宏獎風流如恐不及任安徽學政

時奏言永樂大典中多逸書宜採錄遂開四庫館徵天下遺書古人未傳之本藉以流布昔香山曼卿或主蓉城或歸兜率才人靈爽每有所憑學士武夷之召夫豈無徵吏部名超然以部曹提學四川清操絕俗生平積學砥行所著書皆切倫常日用詞僅存一闕

萬氏詞律成於康熙二十六年共六百五十九調計一千一百七十三體至五十四年

欽定詞譜成共八百二十六調計二千三百六體較之萬律增體一倍有奇然校定爲譜者僅居其半餘皆列以備體而已乃采取猶有未及如李光莊簡集之瓊臺

王質雪山集之紅窗怨無月不登樓吳則禮北湖集之
江樓令陽春白雪所錄潘元質之孟家蟬譚宣子之鳴
梭西窗燭曹邕之惜餘妍劉壎水雲村稿之湘靈瑟王
寂拙軒集之紅袖扶仇遠無言琴譜之睡花陰令陽臺
怨又陽春白雪所錄李宏模之仄韻慶清朝杜良臣之
平韻二姝媚杜龍沙之平韻雨霖鈴劉學箕方是閒居
士集之憶王孫清波雜志所錄朱耆壽之瑞鶴仙碧雞
漫志所錄宇文虛中之迎春樂字數句讀均殊亦未編
入又一體至浙江通志錄文與可同天香引云三月三
花霧吹晴見麟鳳滄洲鴛鴦沙汀華鼓清簫紅雲蘭棹

青紵旗亭。○細看來、春風世情。都分在、流水歌聲。弱燕嬌鶯。冷笑詩仙。擊楫揚舠。當是天香引正體。爲北曲折。桂令所自出。顧不收此詞。而收倪雲林張小山之折桂令。以及名天香引。合而一之。所收映山紅。慢乃宋時元絳作。而訛爲元載。以是知鄧林滄海雖奉

勅搜討。尙多遺佚。且考核偶疎。卽不免舛午。昔與伯夔丈談此。丈云。天下事大抵如此。世人每恃其一己之私。謂足以甄羅無失。其失彌甚。文字其一端耳。

昔有友人論及乾隆中詩人推袁蔣趙爲三大家。顧毀譽各半。迄無定評。適姚君春木在座。言隨園出入誠齋。

放翁一家而善於變化藏園以山谷爲宗而排晁過之
甌北學蘇而離形脫貌獨出心裁其氣概皆足牢籠一
切惟去唐音尙遠少陵云老去漸於詩律細細之一字
概似未聞蓋未能斂才就範是故能詩而不能詞余於
詩無所解未敢置喙然博雅敏給如三家後人正未易
及心希太史頗以工詞稱惜所著銅絃詞時雜以詩句
曲句王氏詞綜祇選三闕而已其嗣君秋竹廣文
知節
詞獨清妙吳蘭雪香蘇山館集中附其題牛坳吹笛圖
洞天歌云誰家牧子下斜陽樵徑短笛聲清四山應任
吹來天籟略帶宮商渾不減五月落梅風韻○知音桓

子野傾耳風前。一樣青雲動幽興。懸簿徧高門。挾瑟吹竽。難陶寫騷人情性。便白石南山甯生歌。也不令斯時。溷人清聽。可謂別具妙心。自饒雅韻。

語有宜於詞。不宜於詩者。富平李天生太史。

因篤

別母

詩云。老母憫遊子。欲言先歔歔。不問何日行。先問何日歸。非不真摯。終嫌淺率。錢謝庵吏部用其意爲臨江仙。後結云。行期還未定。急爲問歸期。便覺情韻悠長。耐人循諷。昔鍾仲山有郊行句云。燕子不來蝴蝶瘦。餅桃開得可憐紅。余曾語以宜易爲詞入之。詩中纖矣。吏部子

小謝明府

廷煥

亦工詞。臨江仙云。記得箇人臨水住。幾

同舟泊橫橋。三層樓上度春宵。同拈雙帶子。量取別來腰。○才上明燈扶半醉。相攜更蕩蘭橈。是誰隔舫坐吹簫。惹他綃帕上。香淚溼紅潮。消寒咏古分賦得黃華坊。爲明妓薛素素故居。水龍吟云。長安九陌花飛。餘香埋卻。韋娘宅。黃華坊底。粉垣零落。一痕斜日。鳳去臺空。燕歸樓圯。問誰曾識。向荒苔尋徧。襪痕屐印。渾不見。行雲跡。○傳說技誇雙絕。控花驄。自調金勒。鬟絲拂柳。舞衫翻錦。一鞭飛疾。波妹弓圓。韓嫣彈去。路人爭拾。嘆繁華何處。可憐都付。幾聲啼鴉。前詞樓上。帕上重兩上字小。令中不犯爲佳。

春草碧卽番槍子以韓玉詞尾三字名之詞律未加研
究誤分二體其詞云莫將團扇雙鸞隔。要看玉溪頭。春
風客。妙處風格蕭閒。翠羅金縷瘦宜窄。轉面兩眉攢。青
山色。○到此月想精神。花凝秀質。待與不清狂。如何得。
怎奈難駐朝雲。易成春夢恨又積。送上七香車。春草碧。
按四庫全書總目言宋時有兩韓玉其一金史有傳字
溫甫北平人金進士官鳳翔判官當路忌其卻敵功被
誣死一於紹興初挈家而南授江淮都督府計議軍事
見葉紹翁四朝聞見錄著有東浦詞

王蘭泉司寇初集同時師友詞爲琴畫樓詞鈔後輯

國朝詞綜無不錄入獨遺吳蘭汀大令

元潤

香溪瑤翠

詞豈因其中歲閱牆薄而屏之耶大令長洲人官衛輝知縣爲竹嶼中翰弟詞體柔媚頗似秦柳眼兒媚云夢中尋覓覺來空不道乍相逢海棠深徑衣香翦翦襪印弓弓○含情卻看籠鵲挂絮語諒難通銷魂此際眉凝寸碧臉暈微紅浪淘沙云深院泛光風香逗蘭叢晚聞百舌喚春慵盡得入時眉樣好卻是愁中○花影一重重翠箔斜籠靈犀脈脈香難通不分翩翩雙燕子飛過牆東園居春晚有懷竹嶼兄時客武林祝英臺近云竹風輕花露滴暝色映簾箔手拓西窗誰與共琴酌喚愁

葉底鵲聲暗催春去。渾不管倦懷寥落。○歎離索。幾回
夢繞池塘。相思渺難託。夜雨聯牀。空憶舊時約。思君門
掩孤山。倚闌吟徧。對滿院楊花飄泊。是其始非不怡怡
如也。同時蔣遜如。刺史有哭弟百字令云。天乎何酷。正
田荆芳茂。一枝先萎。憶昔推梨。還讓棗。幼慧早傳鄉里。
金闕纔登。玉樓遽召。競爽而今已。雁行中斷。不堪翹首
雲際。○思子况見雙親。憑棺絮語。互灑風前涕。爲勸節
哀。佯作達。難掩神傷心忤。姜被寒生。謝池夢杳。中夜頻
驚起。泉臺思慰。忍教孤寡無倚。沉痛語不堪卒讀。刺史
名國華。乾隆中進士官黃州知州。亦長洲人。

閩語多鼻音漳泉二郡尤甚往往一東與八庚六麻與
七陽互叶卽去聲字亦多作平故詞家絕少獨龍溪李
鳳岡太守威久任西曹詩字俱宗山谷間作小詞後出

守廣州乞病歸年八十餘矣余在漳州曾錄存數闕對
雨千秋歲云分蜂時候孤榻閑長晝山雨過輕寒透髮
愁潘令改腰怯休文瘦午睡醒驚看窗外梅如豆○索
米長安久只是人依舊風意峭雲紋縐萍應池沼滿麥
正郊原秀花事少鼠姑已殿殘春後又同安劉芝圃孝
廉逢升芝生草堂詩附有數詞眼兒媚云蓮衣吹墮鏡
雲迷惆悵蝶來遲朱闌十二紅橋廿四立了多時○當

時枉織鴛鴦錦。還是苦凝思。最難忘處。初三月約。下九
星期。殊雅潔。餘多粗俚。不僅調外而已。

王丹麓

諱

今世說言王山長

岱

湖潭人能詩文兼工書

畫嶽崑崙落名滿海內。而不言其能詞。按山長一字了
庵前明舉孝廉入國朝官知縣有山花子云寒氣侵
簾怕上鉤。金瓶香凍百花油。試拂鏡奩依舊似。一泓秋。
○宿酒已消雙頰暈。新螺偏感兩峰愁。欲折蠟梅呼婢
子。下紅樓。蔣氏瑤華集錄其白門春日滿江紅云。歷盡
嚴寒。東風暖。爲催春到。聽深巷。賣花聲過。新妝競巧。金
縷檀槽歌子夜。松茵油壁迎蘇小。看花忙。如蝶苦銷魂。

知多少。○年如舊。人空老。無情事。多煩惱。歎六朝如夢。
又生芳草。天自傷心。天不語。春惟有恨。春難好。願從今
一洗可憐腸。金尊倒。江浙妓女。每出門。侑酒名盛者。一
夕十餘處。所謂花忙如蝶也。知此風由來久矣。

識人未遇時。已難識之。而肯力助其成。尤難相傳。梁構

亭制軍

肯堂

未遇時。潦倒浙闈。遊揚州。困甚。思染指漕

務。得數十金。以歸挾友人書。謁丹徒令。任丹徒者時爲

潛山熊太守

會珍

便服。延見。殊簡傲。酬答十數語。忽易

衣冠。補行相見禮。謂曰。觀君氣宇。騰上必速。何落魄乃
爾。今縣試在。卽姑爲吾閱卷。一日攜五百金。謂曰。吾爲

子籌非此不足北上。今以相贈，後不必償。第攜此金去，仍沉浮幕客。我知之，必遣人索。銖兩不能少也。次年爲乾隆庚午，制軍舉京兆仕至直隸總督，著有石幢居士吟稿。梁晉竹孝廉紹壬兩般秋雨庵隨筆錄其安公子云：「不道春歸也。一春飄泊，名花謝。風雨妒花飛片片，亂穿簾罅。看玉骨瘦無半把。妝初罷，卻爲甚暗地將愁惹。最堪憎是，徹耳啼鶯，聲聲嬌婉。○待把流鶯罵。罵時休想鶯兒怕。離怨繫來心裏病，翠毫難寫。還自過曲臺芳榭，閑消夏。更不管冷落秋千架。恨雲惱月，者樣癡情，與誰同話。」詞平平耳，因述熊公贈金事並錄之。

閩縣葉小庚太守

申薊

由己巳翰林出宰滇南海升河

南知府生平喜爲詞輯有閩詞鈔天籟軒詞選詞譜詞
韻本事詞等書用力甚摯其自著意在瓣香北宋顧所
詣頗近龍川龍洲二家如鷹潭晚眺謁金門云登臨適
遠水遙天一碧。歷歷去帆山嘴滅。晚江風正急。○高岸
楓丹柏赤。淺渚煙消霞澀。做弄秋光娛倦客。客懷愁轉
集。端午日泊蘭溪南樓令云溪水碧如油。溪娃慣盪舟。
俏淩波、秀靨明眸。生長闌干船上住。渾不解、別離愁。○
佳節快臨流。蘭橈枉滯留。憶臺江、競渡芳游。鬢影衣香
簾盡捲。人都上、水邊樓。

郭頻伽浮眉樓詞有題蜀主王衍停空鏡月華清六秋
老蟾蜍春回鸞鵲。故宮鉛水。冷。蜀道青天。鑄出一九
孤影。想當日。媚臉傳紅。定照見。醉妝初醒。誰省。向麗情
集裏。芳名細認。○記否良工質瑩。正繡幌低懸。綺窗幽
靚。尖裏羅巾。有箇如花人並。算儘隨。金盃飄零。問可似
玉奴長恨。堪哂。怕後來花蕊。宮詞難詠。鳧薌宗伯紅豆
樹館集中亦有是題並錄其背銘云鍊形神冶瑩質良
工如珠出匣似月停空當眉寫翠對臉傳紅綺窗繡幌
俱幽影中與十國春秋蜀主賜王承休妻嚴氏鏡銘詞
正同初謂停空之名取銘中似月句耳後余遊蜀覺生

叔父

楊

藏一鏡謂能映日見字故名停空鏡徑五寸餘

邊厚五分背中心鑄太極外環八卦再外環十二生肖
邊環楷書三十二字卽銘詞天時晴朗以鏡面向日支
以木架下置白紙相離尺許鏡背之太極八卦生肖銘
字皆現紙上如隔輕紗並無銅質者晚以燭映亦可然
不如日中明顯不知與宗伯及白眉生所見是一是二
相傳當日共鑄二十枚其鑄法莫得而考矣

粵東詞家甚少近日嘉應吳石華番禺儀墨農始以詞
名石華名蘭修嘉慶戊辰舉人官教諭有桐花閣詞采
桑子云輕陰著意催寒食風也纖纖雨也纖纖半臂吳

綿昨夜添。○海棠過了梨花病。春也恹恹。人也恹恹。不
耐傷心怕捲簾。蝶戀花云。恨縷情絲紛似織。病過花朝。
又是逢寒食。多少春懷拋不得。都來壓損眉峰窄。○爲
底愁腸成百結。一味多愁。只恐非常策。葬罷落花無氣
力。小闌干外斜陽碧。題吳蘭雪悼亡姬岳綠春聽香館
叢錄疎影云。簾櫳正悄。有青禽啼處。深翠圍繞。幾折回
廊。幾點苔痕。都是展聲曾到。薜蘿隱約裙腰碧。襯一片
傷心斜照。甚東風。苦苦無情。便把柳枝吹老。○卻意那
時年少。鬢雲纔挽上。眉際春小。黛不禁濃。螺也嫌深。無
可奈何懷抱。二分細膩三分怨。總未許。檀奴看飽。歎人

生幾日相憐。腸斷一庭秋草。蘭雪納妾時方以國博改
中翰有人戲以詩云逢人勉強稱前輩對妾殷勤學少
年證以未許檀奴看飽句令人欲笑墨農名克中少遊
京師道光壬辰始舉於鄉有劍光樓詞浣溪紗云月暗
堤長樹影連。一星螢火墮濃煙。夜涼如水抱愁眠。○只
有蟲聲來枕底。更無塵夢到鷗邊。聽風聽水又經年。蓬
窗聽雨用玉田生韻南浦云夜雨隔蓬聽。乍成眠。卻又
啼鶯催曉。墜夢覓江潯。東風軟。況是閑愁難掃。垂楊夾
岸。斷煙浮出青山小。目送流紅何處去。魂醉王孫芳草。
○心頭無限江山。向鳴榔聲裏。等閑過了。新恨未分明。

消凝候。驀地舊愁都到。回眸望渺。而今燕語鷗盟悄。一片歸雲留不住。窗外夕陽多少。

吾邑劉震修廣文

雷恒

與弟沛然茂才

霖恆

均以文行

重於時百餘年來遺編無可覓矣廣文有百字令云早知離別。悔當初一笑。等閑心許。自與雲英成間隔。回首玉京迷路。篋扇涼深。機絲露溼。冉冉三秋暮。鈿蟬零落。伊州一曲誰鼓。○就裏多少相思。緘愁欲發。祇欠歸鴻度。竟夕清砧將遠夢。分付月明來去。小影熏香。新詩斷帶。觸著添離緒。寄聲安否。此情惟感鸚鵡。茂才浣溪紗云倩得蕉陰蔭石欄。空庭鶴小步珊珊。幾回幽夢未全

闌。○雨點無多敲夜靜。鳥啼一半送春殘。澹寒生處怯
衣單。茂才此詞王氏錄入詞綜而未誌。里居與字蓋采
自倚聲集。未知爲何處人也。余嘗謂倚聲初集草堂新
集詩餘醉等書或書名或書字。旣不詳書爵里。又不列
明時代。自趙聞禮陽春白雪始作之。俑楊升庵陳耀文
見爲新異。踵而繼之。益形其陋。於知人論世之學茫乎
未聞。不但所選各詞大半俚俗而已。

臺陽籬落間半植草樹。有名綠珊瑚者。不花無葉而枝
幹橫生。葱翠可喜。亦海外異卉也。唐益庵廣文璵咏以
玲瓏玉云。鐵網兜來疎籬外。翠影莎籠煙梢七尺。賽他

火齊殷紅。遮斷蘆簾紙閣。怕龍鬚誤竹。虬爪疑松。青葱。
倩瓊釵。簪向鬢蓬。○細認毘耶別種。稱徐陵架筆。越樣
玲瓏。試折纖柯。配詩人、瘦削游筇。何須綴枝密朶。早襯
徧、苔階涼月。展印弓弓。渾不見、綠衣娘。飛上淺茸。益庵
居秀水。余三十年前舊友也。詩文敏捷。工隸書。屢試不
售。爲人司記室。後遊臺灣。值寇警。以殺賊功。銓富陽訓
導。方謂苜蓿一盤。堪以娛老。又值杭州陷。避亂來閩。鬢
髮皓然矣。出竹西小築。詞屬爲校正。余有獻替應時。改
定謁金門云。蛩語悄。秋意被他偷報。碧瀉銀河流到曉。
牽牛花放了。○一徑梧陰誰掃。月底玉簫聲杳。簾捲西

風人暗老。怕將鸞鏡照。舟行卽事蝶戀花云。一葉舸輕柔。櫓短。翦破鞦韆紋。百摺春羅軟。幾片落紅飛斷岸。雙雙綠鴨銜來遠。○曉日微烘風力緩。不信浮槎。穩可通銀漢。夢壓鴛衾猶未轉。玉驄嘶向誰家院。題祝菊門孝廉瀟湘聽雨圖。淒涼犯云。夢回篷底。連宵雨。聲聲都帶秋意。荒洲斷渚。鷗寒鷺冷。客游倦矣。飄蕭未已。問灑徧黃蘆叢未。怕湘娥。千秋幽怨。驀地又勾起。○遙指峰青處。爪印泥痕。而今猶記。生綃重展。認依稀。層巒如洗。一抹煙痕。把多少。離魂牢繫。憶年時。點點似和斷雁淚。益庵至閩。無所遇。重渡東瀛。爲書院山長。近聞以言賈。

禍旣老且貧其詞未必能刊再錄數闕於此鵲橋仙云
鶯啼人倦。鵲啼人怨。春老幾家庭院。惜花枉自囑東風。
早飛卻殘紅一半。○天涯何遠。流光易換。漫把水晶簾
捲。隔牆倩影送秋千。應不解、愁長愁短。迷神引云慘瓦
清霜催寒急。聲遞誰家橫笛。風吹羅幙。閃銀燈滅。夜初
長。人何處。暗悲噎。記得梅花開。遲夜月。記得柳花飛。碾
晴雪。○秋上心頭。愁過秋時節。便到愁來。和誰說。雙鬢
刁騷。早融盡。肝腸鐵。悵年時。紅牆近。蓬山隔。睡也數更。
更。魚柝擊。醒也聽聲聲。虬漏咽。白下高竹坡。以明月滿
船歸去。好美人親手炙鱸魚。句意繪圖索題爲賦摸魚

兒云算年來。搖煙盪月。狎鷗生計差近。半規蟾魄湖心
浸。端正一奩明鏡。卿試問。問秋老。萼肥何不攜歸艇。襟
塵澣淨。羨軟剪鞞紋。低勻黛翠。重把莫愁認。○舫樓底。
好是不愁孤另。纖纖微露眉靨。宵深穩抱鴛鴦宿。蓬背
悄移花影。君且聽。聽珠樣纖喉。唱到風波定。別饒清興。
看暖炙銀鱸。滿浮綠蟻。此樂更誰省。

晁端禮以蔡京薦爲大晟府協律。時值河清獻詞云。晴
景初升。風細細。雲收天淡如洗。望外鳳凰城闕。蔥蔥佳
氣。朝罷香煙滿袖。侍臣報天顏有喜。夜來連得封章奏。
大河徹底清泚。○君王壽與天齊。馨香動上穹。頻降祥

瑞大晟奏功六樂初調角徵。合殿熏風乍轉。萬花覆千
官盡醉。內家傳詔重開宴。未央宮裏。卽以黃河清慢名
調京子。條鐵圍山叢談謂其音調極美。天下無間遐邇
大小皆爭唱之。近日萬氏詞律漏未收。采按葉少蘊避
暑錄話言崇寧初大樂無徵調。蔡京徇議者請欲補其
闕。教坊大使丁仙現云音已久亡。不宜妄作。京不聽。遂
使他工爲之。踰旬得數曲。卽黃河清之類。京喜極召衆
工按試。使仙現在旁聽之。樂闕問何如。仙現曰曲甚好。
只是落韻。蓋末音寄煞。他調俗所謂落腔是也。詞中六
樂初調句。正以諛京。其時朝臣無不從風而靡。仙現一

樂工耳獨矯矯不阿如此與石工安民不肯刊名元祐
黨碑正復相似噫是非風節不在士大夫而在草莽宋
之所以南渡歟

增胡鑑校字

聽秋聲館詞話卷十九

無錫丁紹儀杏舫

合肥趙野航

對徵

官廣德學正城陷殉難著有小羅浮

館詞陳叔安明府知余輯補詞綜出以見示囑選數闕以彰忠節奈通首完善者百無一二中如夾溝驛弔烈女秀姐金陵城陷悼崇夫人袁柔吉投池殉節麻城朱氏婦年十九被掠至安慶題詩投江死皆絕好題目而詞甚粗淺朱氏詩亦未錄僅夜坐有憶虞美人云垂簾坐聽瀟瀟雨。響答疎蛩語。新開小閣迺微涼。卻怪今宵似比昨宵長。○扁舟猶記來時路。水暖春江渡。石城潮

接廣陵潮。待遣離魂先到小紅橋。差爲近雅集後附其

子子琴

貽玗

影梅詞子鶴

錫璜

倚笛詞亦學蘇辛而未

至者子琴蝶戀花云十幅蒲帆風力飽。浪跡天涯。塵夢
何時了。葉落霜寒江樹老。荒荒野渡餘殘照。○款乃聲
中墟散早。隔浦漁歌惹起愁多少。指點吳山煙景好。征
鴻此際飛應到。子鶴南陵道中點絳脣云落葉蕭蕭馬
蹄雜沓。陵陽驛。盾磨矛淅。有客新投筆。○仗劍從戎。不
怕關山隔。烽煙逼。幾聲篳篥。攬入離亭笛。顧文蕪塘嘗
言蘇辛二家詞如天仙化人不可彷彿最不易學亦不
宜學非若姜史諸家各有軌轍可循

謝雨亭明府以吾郡趙于岡孝廉起約園詞見示並言

孝廉家素饒舉庚子鄉試第二人以慷慨好施傾其資
幾半咸豐十年佐團練事賊踪近大吏已遁猶力守不
懈城陷一門七十餘口投所居約園池中死僅一子今
仕楚南囑并書之其菩薩蠻云晚妝慵啟青鸞鏡金鑪
煙燼衣香潤風落鬢邊花暗添雙臉霞○蘭缸挑易施
心事憑誰話默默倚屏山酒醒羅袖寒墨牡丹摸魚兒
云似韶華太嫌濃麗寶奩爲卻金粉元裳縞袂臨煙闕
壁月素輝剛近妝淡靚是一朶蓬萊割取仙雲影尊前
細認想慵倚朱闌指痕將捻殘醉未曾醒○瑤臺畔拚

得終朝酩酊。飛觴爲酌佳醞。妍姿不藉胭脂染。恰稱鴉
鬟修整。春晝靜。請試數姚黃魏紫誰堪並。群芳漫逞。縱
無限芬華。梁炊未熟。且住黑甜境。因憶余友韓曙樓太
守。純禧咏黑牡丹云。樓臺高處談玄好。富貴場中守黑
難。句雖不超。頗足針頑砭俗。

錢塘魏滋伯明經

謙升

博學工文近推詞壇祭酒其猶

子稼孫麟尹

錫曾

出所著翠浮閣詞見示言亦殞粵匪

難矣。點絳脣云。人去樓空。古槐深巷。重門靜。月容如病。
林外將人等。○舊日巢痕。苔沒二三徑。樓鴉定。畫橋煙
暝。錯認驚鴻影。禹航清明懷小園花事。長亭怨慢云。問

何故春風暖。驪道已清明。一番寒透。細啄芹泥。鄰家燕子語長晝。故人歸矣。來踏破。苔痕繡。寂寞禁煙中。聽巷陌。飴簫吹又。○似舊。想家山龍井。正是采茶時候。塋西花事。恐容易。綠肥紅瘦。昨夢見。小院藤陰。已芝蓋。香雲濃覆。料鏡裏眉痕。應與遙峰競秀。

長樂謝枚如廣文

章鉅

僑居榕城好與同志徵題角勝

會哀刊聚紅榭唱和詩詞詞學因之復盛雖宗法半在蘇辛亦頗有可采盤香采桑子云紗窗人坐氤氲裏一握絲團一點星寒火候如丹九轉還。○纏綿愁緒銷難盡。良夜將殘。好夢初闌。不信柔腸斷不完。炊煙齊天樂

云一絲宛轉徐徐起。臨流幾間茅屋。著雨拖青。當風曳
白。移傍斷雲更綠。乍離乍續。看掩映斜陽。孤村一簇。忽
地低飛。簷牙樓角遠相逐。○驚心烽燧未息。歎蕭條萬
戶。多半炊玉。竈減難添。灰燃已死。經得幾番陵谷。客來
不速。賸好夢堪尋。黃粱未熟。便當卿雲相看。同豁日侯
官劉雲圖 紹綱 蝶魂眞珠簾云春愁黯黯晴兼雨。恣勾
留。總在芳菲多處。深院悄無人。只一天飛絮。不信東風
吹不懶。尙兀自游情栩栩。休去。問翦紙相招。誰家庭宇。
○恰似倩女身輕。早朱闌繞徧。依依芳樹。曉夢醒羅浮。
更翩然來暮。不怕鶯捎和燕逐。卻恐被游絲纏住。最苦。

是簾影沉沉落花無主。長樂梁洛觀。

履將

落葉雪獅兒

云疎疎螢點。淒淒蛩語。黯銷魂地。亂掩閒苔。門巷再來
難記。寒林盡醉。怡涼月。半規低墜。憶昨夜。驛亭殘酒。不
知醒未。○算有飄零客袂。倚西風。耐得者般情味。萬種
離愁。獨上瘦藥紅蕊。秋聲雁背。帶一片。霜華如水。空階
外。多少玲玕詩思。聞縣馬。子翔孝廉。淩霄湘簾步蟾宮

云波紋綠。綳花枝。彈儘付與。晚風搖簸。一絲香篆。繞銀
鈎。又散了。箇儂清課。○斑斑淚點。何人墮。看翠黛。兩彎
愁鎖。玉蟾上。早燕歸遲。且捲向。黃昏獨坐。劉壽之二才
海棠連理枝。云幾點離人淚。化作相思蕊。脂暈微凝。粉

香休澹。檀痕輕綴。怪東風不解展芳心。任秋來憔悴。○
嬌極渾如醉。淡極還疑睡。禁得黃昏月華低映。盈盈欲
墜。倚回闌。待要理新妝。更與誰相對。李星村應庚羅衫

浣溪紗云。瘦骨珊珊弱不勝。纖羅初御最宜人。開箱重
把水沉熏。○隔歲酒香猶未減。及時花樣幾回新。不堪
頻挽是啼痕。長樂陳彥士文翊字塚百字令云。叢殘拉

雜。甚年來費盡。無聊筆墨。擬向江流深處葬。生恐魚龍
不食。荷柄長鐙。借坏黃土。從此堪藏拙。何須更道。深深
瘞玉堪惜。○縱有多少精華。一般埋沒。誰繼千秋業。比
似年來征戰苦。猿鶴沙蟲同劫。碑碣誰題。光芒永閼。休

被農夫識。寄聲靈鬼。夜臺莫再悲泣。聞縣王子舟彝讀。

史記游俠傳。滿江紅云。雨覆雲翻。休只道。世風日薄。念
自昔。炎趨羶附。一般握麈。緩急人情時或有。死生幾輩
真堪託。更伊誰解。重賤貧交。平生諾。○背盡裂。疇能學。
頭堪借。何妨斫。奈奇文共賞。斯人不作。杯酒且從屠狗
飲。千金枉縱朱家博。賸一腔熱血。湧如潮。今猶昨。徐雲
汀孝廉一鶚春水卜算子云。寒綠縐東風。雨歇波猶冷。
一種春愁較淺深。瘦減池闌影。○落盡小桃花。紅漲三
篙緊。桃葉桃根何處迎。斜日催孤艇。蓼花柳梢青。云水
國。蕭然疏疏幾點。殘照堪憐。烏桕千株。叢蘆一片。相映

增妍。○扁舟曾宿江天。看瑟瑟涼搖暮煙。病酒衰顏，斷蓬孤影，瘦到今年。題多咏物，惜僅詞中一體而已。

吳縣潘氏以甲第文章冠吳中，聲望之崇，尤推芝軒相國。世恩由癸丑第一人躋宰相，雍容黃閣垂二十年。

子星齋司空。

曾瑩

紱庭侍讀。

曾綬

均生長華廬，而詞甚清。

綺司空有鸚鵡簾櫳詞，送張亨甫出都卜算子，慢云垂楊未老，杜宇又啼，惆悵暮雲千里。殘醉初醒，贏得一番離思。寫新愁，半在斜陽裏。半付與鷗邊遠夢，比他煙驛迢遞。○夕露晨星地，料一領青衫，夠人憔悴。六六文鱗，定有舊情能寄。亂蟬聲不盡，流連意算只有一輪明月。

伴征人歸矣。聞蟬清平樂云一絲微裊。爲問秋多少。滿地綠陰涼意早。教把斜陽遮了。○最宜雨後風前。聲聲換得商絃。記向紅橋載酒。萬荷花裏停船。侍讀有睡香花室詞。秋夜聞笛步蟾宮云。誰家弄笛聲幽咽。正雨過閒階清絕。聲聲吹到舊時愁。更吹出舊時明月。○碧荷花朶新堪折。又茉莉叢香如雪。芳蘭箭箭是秋心。想江上玉龍吹裂。月華清云。花半開時。月初圓後。箇人三五年紀。才識春愁。便把秋心催起。道秋來蟋蟀聲中。似春去杜鵑聲裏。難睡。看花光如夢。月光如淚。○下了簾鉤。獨自獨自繞銀屏。一燈殘穗。記起濃歡。閒煞鳳幃鴛被。

惱者番。雁字全虛。悔那日。鯉函空寄。憔悴又三更風雨。
月沈花碎。余伯父雙梧公。應嘉慶戊辰秋試。爲相國所
取。第二人。顧素無一紙往來。詞係胡畫溪觀察。光瑩聞

余輯補詞綜。囑爲甄錄。司空兄功甫舍人。會沂弟季玉

觀察。會璋詞筆亦工。僅見黃蓼花唱和詞中。高陽臺各

一闕。稿均未見。相國孫伯寅。祖蔭今繼爲少司空。吳又

賓。齋尹。其康錄示題。恭邸荷淨納涼圖。摸魚兒云。繞

林亭。水香不斷。鷺鷥飛破煙杪。玉璫羅襪。淩波步。倦舞
環妃欲笑。尋翠窈。指一鏡風漪。四面垂楊好。煙絲細裊。
恰低按霓裳。平鋪瑤席。麴院恣幽討。○紅闌外。花事平

泉未老。自移書畫船小。冰華瓊萼相輝映。只有冷香吹到。鷗夢悄。問水閣虛廊。何處秋來早。詩情換了。算箏碧傾荷。裳紅製芰。怎似此襟抱。

司馬溫公西江月云寶髻鬆鬆綰就鉛華淡淡妝成紅雲翠霧罩輕盈。飛絮游絲無定。○相見爭如不見。有情還似無情。笙歌散後酒微醒。深院月明人靜。極豔冶之致或謂決非公作此如歐陽文忠堂上簸錢詞當時忌者託名以相挽耳抑知靖節閑情何傷盛德同時范文正韓忠獻均有麗詞安知不別有寄託若謂綺語不宜犯以訓子弟則可不應以律前賢

近日詞家鮮工歐晏體者。獨鎮海姚梅伯孝廉。爽疎影
樓詞頗具神似。如愁倚闌台云。垂茜袖。側金釵。立蒼苔。
昨夜陰陰微雨過。海棠開。○羈人無限春懷。歌聲隔。楊
柳池臺。簾幙疎疎風仄仄。燕飛來。一落索云。獨立亂紅
深處。背風無語。怪伊蝴蝶繞人飛。卻不向花邊去。○重
上畫樓日暮。江煙催雨。帆來帆去總依稀。惱多種。垂楊
樹。少年遊云。曲瓊低押。重簾靜。煙氣夕沉沉。繩繩雁去。
彎彎月上。寂寂此時心。○玉釵墮響。誰重覓。只賸粉暈
羅衾。瘦影依燈。斷腸聞笛。夜淺夢難深。或云梅伯詞實
私淑浮眉樓去。歐晏尙遠。

國家科場條例最嚴而請託時有以故屢興大獄亦間

有被訐負枉者康熙間常熟歸惺厓少詹

允肅

緣事被

黜以薦復起主辛酉順天秋試所取皆知名士下第者

譁然幾被中傷時蔚州魏敏果

象樞

以朝端重望官都

御史登少詹門下拜曰吾爲

國家慶得人並賦詩頌

之謗者乃息前賢善成人美如此少詹著述不多見傳

有遙和在平夫子午日讌集韻金縷曲云記得名園路

倚南城危亭曲沼參差堪數韋杜風光饒勝賞幾度追

陪尊俎奈此日雲泥遠阻遙想良辰多樂事隔天涯總

是關情處春盡也又端午○傳來麗曲增淒楚縱他鄉

依稀景物還供蒲黍。身作行吟憔悴客。贏得青衫淚苦。
拚醉倒。盈觴綠醕。更憶故鄉喧競渡。蕩蘭橈。一霎飛香
雨。徒極目。共誰語。詞殆作於貶黜時。

吳越女子多讀書識字。女工餘暇。不乏篇章。近則到處
皆然。故閨秀之盛。度越千古。卽以詞論。王氏詞綜所采
五十餘家。已倍宋元二代。余輯詞補復得一百七十餘
人。茲錄其尤雋峭者。太原張羽仙。

學典

菩薩蠻云。遠煙

舒翠籠新柳。春光暗向樓中逗。莫把繡簾開。東風引恨
來。○遙山雲一帶。人在雲山外。芳草似離情。逢春處處
生。華亭李冰影。

眺

尋芳草云。贏得千愁逗。閑拋卻許多。

月色正夢回窗外寒煙碧聽隔院誰吹笛○腰瘦不關
秋看良夜露珠頻滴又哀哀孤雁鳴沙磧魂去也江山
黑懷慶李冰心素眼兒眉云無端風雨到高樓春思總
悠悠芙蓉帳挂水晶簾捲恰好梳頭○落花可惜無人
惜空自付東流傷心何限紅衫搵淚綠酒澆愁吳縣楊
元卿激玉樓春云香閨幾度眠過曉羅綺風柔驚料峭
碧桃萬樹倚雲栽一陣東風都放了○花枝手自凌晨
拘圖史餘閑香篆裊雕闌十二鎖春寒樓閣重重人不
到上元馬芷君閑卿柳腰輕云從來那慣愁滋味腰正
瘦心將碎烏雲纔綰黛螺慵畫掩著瑣窗尋睡敲朱戶

簷馬聲淒。戰金風。井梧葉墜。○不分芙蓉沉醉。笑海棠、
露濃紅退。滿懷離緒。倚闌無語。兀自偷垂香淚。總知是、
秋夢無端。沒來由。把人憔悴。奉賢莊。磐山燾卜算子云
積雨喜新晴。小院風初定。月滿瑤階露氣浮。花動雕闌
影。○寶鼎篆煙微。幽夢殘燈省。忽逐鐘聲度小橋。不管
春衣冷。太倉顧湘英信芳點絳脣云天淡雲閑。雨餘芳
草平如翦。柳眉初展。春色和煙遠。○斜日西樓。人倚東
風倦。鶯聲嬾。一庭花片。綠滿香痕淺。吳縣張瑞芳素蘇
幕遮云凍雲濃。寒霧起。柳絮因風。堆積空庭裏。玉樹玲
瓏搖冷砌。今夜啼鳥。怎樣枝頭寄。○盡簾垂。朱戶閉。獨

自園鑪。遙想人天際。季子貂裘應已敝。叮囑瓊花。莫灑

南來騎。武進錢浣青

孟錕

蝶戀花云。著雨林花紅暈溼。

風裊晴絲。吹入眉峰碧。綠徧池塘芳草色。催歸杜宇聲

聲急。○病起綠窗春事寂。何處留春。深院濛濛月。金縷

歌殘檀板歇。海棠夢醒梨雲白。甘泉江碧岑

珠

憶秦娥

云風淅淅。高城欲落如鉤月。如鉤月。還留一線。照人淒

絕。○宵長夢短愁腸結。漏聲數盡雞聲咽。雞聲咽。香篝

不暖。衾寒似鐵。長洲葛玉珍

秀英

桂殿秋云衣袂冷。上

高樓。繁雲遮斷碧山頭。小窗獨坐聽秋雨。荷葉芭蕉各

自愁。金匱浦靜來

安

如夢。令云幾日嫩寒輕暖。又聽雞

鶯學囀。妝罷倚雕闌。心與芭蕉同卷。人遠。人遠。況是宵
長夢短。江甯歐瓊仙瓊虞美人云井梧簌簌飄黃葉。露
溼寒醬泣。炎天日日盼秋風。怎到秋來蕭瑟更愁儂。○
憑高幾度空懷遠。搖落情何限。斷蓬心事有誰知。除向
天孫相訴有憐時。錢塘孫碧梧雲鳳少年遊云淡掃蛾
眉輕盤螺髻。妝罷更塗黃。雲母屏前。水晶簾外。荷氣雜
衣香。○晚來放艇波心去。獨自覓清涼。笑摘青梅。故驚
女伴。隔水打鴛鴦。孫蘭友雲鶴點絳脣云村柝聲聲。鄉
關夢斷。三更過。紙窗風破。一點殘燈墮。○院靜無人。獨
自開簾坐。重門鎖。梅花和我。對月成三箇。吳江汪宜秋

玉珍

風光好云掩花關。啟花關。看徧春光春又殘。遣愁

難。○空庭雨過苔痕碧。天寥寂。短短回廊曲曲闌。且盤

桓。遂甯楊古雪

繼端

傷情怨云夜靜庭空月轉。曲闌閑

倚徧。頓觸離愁。滿天來去雁。○消息於今夢斷。待寄書

雲水程遠。淚溼羅衣。西風寒撲面。錢塘梁楚生

德繩卜

算子云永夜繡屏孤。香燼金猊冷。寒逼羅幃五夜風。霜

月欺燈影。○落葉斷鴻驚。短夢仍無定。窗外鴉聲續雁

聲。不管人愁聽。長洲李紉蘭

佩金

長相思云思懸懸。望

懸懸。人去天涯欲見難。音書更杳然。○愁懨懨。病懨懨。

愁病支離葬玉顏。問君憐不憐。仁和吳蘋香

藻

浪淘沙

云簾外一重窗。窗外回廊。斷無人處。斷人腸。閑煞玉階
明月影。分外淒涼。○舊夢冷池塘。秋草都黃。芙蓉庭院
又經霜。潮落潮生。芳信阻。水遠山長。陽湖劉撰芳

琬懷

浣溪紗。云淺淡。銀河一鏡升。滿庭花影轉參橫。最閑時

候最分明。○何處簫聲遊舫過。幾家詩思畫橫生。思鄉

有客不勝情。山陰王梅卿

倩

滿宮花。云。紉湘蘭。摧玉李。

春事又過半矣。釀愁風雨近清明。都被林鳩喚起。○睡

曹騰情旖旎。夢墮碧桃花裏。枕函無奈鬢雲鬆。扶向鏡

奩慵理。烏程戴衣仙

珊

踏莎行云。繡倦憑闌。槐陰正午。

榴花窗外飄紅雨。閑將綵線。綰離愁。誰憐枉結同心縷。

○竹影搖涼。荷風拂暑。年年此日傷羈旅。舊時飛燕到
簾西。含情祇對愁人語。錢塘淩苙沅。

祖媛

菩薩蠻云簷

鈴驚破紅閨夢。曉妝人怯餘寒重。纖手捲簾衣。風前放
燕飛。○落紅紛似雪。倦了尋香蝶。樓外易斜暉。春歸人

未歸。金壇吳蜚卿

規臣

采桑子云昨宵星月今宵雨。首

似春蓬。心似秋蟲。畢竟情懷那樣同。○小樓深閉愁無

那才聽疎鐘。又聽征鴻。莫道吳儂不懊懷。吳縣曹宜仙

景芝

清平樂云眼看春去。便是愁如許。窗外鷓鴣啼不

住。日日風風雨雨。○曉來梳洗都慵。怯寒下了簾櫳。簾

底落花如夢。有誰解惜殘紅。吳江沈夢湘

芳

秋柳長亭

怨慢云斷魂處。冷煙疎雨。遠岸斜橋。亂垂殘縷。漫說風
流。可憐不是舊張緒。春前曾記。向鏡裏。窺眉嫵。換了好
繁華。更瘦減。腰支難舞。○秋暮。牘殘蟬留戀。葉底抱吟
淒楚。鶯梭燕剪。恨拋卻。青青都去。最怕聽。唱出陽關。又
勾起。離愁如許。過幾點。蘆花休認。長條飛絮。仁和沈湘
濤允慎卜算子云風月忒蕭條。情緒還依舊。醉裏清歌
夢裏吟。傷得心兒夠。○扶病送春歸。病起悲秋又。花樣
丰神雪樣膚。都爲聰明瘦。

婦人束足使小。或謂起自李後主。或謂唐時已然。康熙
初始禁裹足。凡元年以後所生女子。有纏裹者。罪其父。

母吾鄉顧梁汾典籍賦浣溪紗記其事云閨閣爭傳捧
貼黃。九霄雨露潤蓮塘。錦韉新學內家妝。○六寸圓膚
原有緻。一鈎纖影待重量。春愁穩載莫輕颺。其事起於
宛平王胥庭相國熙時爲侍郎奏言臣妻已放大腳識
者嗤之卒之習俗相沿徒茲訐告不久禁弛相國亦工
詞小重山云斗帳香濃怯影單。珠簾閑不捲。小窗寒。鉤
蟬銀甲罷雙彈。無聊甚。獨自倚闌干。○牆角杏花殘。韶
光餘幾許。漸闌珊。夜來微雨溼輕紈。因誰瘦。暗覺繡裙
寬。就詞論人殆與夏英公竦相似

嘉慶間填詞家咸推吾郡張皋文太史惠言專主比興

所選詞自五季迄同時。朋從僅四百餘闕。矜嚴已甚。顧
學之者。往往非平。卽晦。蓋詞固不尙尖豔。亦不宜過求
純正。如彈古瑟。誰復耐聽。太史自著茗柯詞。亦寥寥無
幾。相見歡云。新鶯啼過清明。有誰聽。何況朝風夜雨。杜
鵑聲。○留春住。催春去。若爲情。賸有畫梁雙燕。語惺惺。
楊花。木蘭花。慢云。儘飄零。盡了。何人解。當花看。正風避
重簾。雨迴深幙。雲護輕幡。尋他一春伴侶。只斷紅。相識
夕陽間。未忍無聲委地。將低重。又飛還。○疏狂情性。算
淒涼。耐得到春闌。便月地和梅。花天伴雪。合稱清寒。收
將十分春恨。做一天愁影。繞雲山。看取青青池畔。淚痕

點點凝斑。太史著述以古文爲最詞固餘力及之

太史弟翰風太令

琦

久遊京師嘉慶癸酉始舉京兆出

宰館陶有立山詞南浦云鴛枕夢扶頭睡醒來又是夜
長難曉心事正懨懨疎窗外來去亂鴉多少趁將斜日
西陵獨自尋蘇小前度簾櫳雙坐處惟有博山煙裊○
問誰解道看花有溫香密意恨人不了衣上淚痕多還
只怕勾起傷春懷抱相思難訴又教添著愁心悄料得
玉人今夜裏一樣離魂顛倒水龍吟云隔花人去迢迢
佳期悵望知何許重門掩卻淒涼獨自空階凝伫燕子
歸來偏他忍看滿天飛絮算春光九十誰人消受都付

與風和雨。○一掬傷春鉛水對花前。幾回傾注。柳絲恨

短。榆錢恨小。縮春不住。最是多情。裙腰芳草。青青如故。

只倩他纖手。撚來臙碧。慰花遲暮。超俊不讓乃兄大令

因長子誤藥死。遂究心醫理。能起沉痾於垂斃。堂皇下

求診者恒滿。子仲遠名曜孫亦工醫。能詞以知縣仕楚

北游擢糧儲道。曾刊其女兄弟詩詞爲毘陵四女集。長

孟緹紹英。適常熟吳偉卿比部廷珍。有澹菊軒詞浪淘

紗云。病怯晚寒嚴。休捲重簾。穿窗無奈朔風尖。人與梅

花同瘦損。一晌懨懨。○新月上雕簷。眉影纖纖。閑愁暗

逐漏聲添。回首嶽雲千里外。清淚空黏。次婉紉綸英。適

逐漏聲添。回首嶽雲千里外。清淚空黏。次婉紉綸英。適

同邑孫氏和妹咏菊高陽臺云春夢驚回槐陰捲盡年
光漸近深秋雨細煙濃誰憐花事都休叢殘已分同芳
草仗輕雲扶上瓊樓最堪憐似笑還顰暗抱新愁○閑
情陶令常相憶悵霜天寥迥繁豔全收耐得淒清幾回
顧影籬頭亭亭獨立西風裏歎江梅沉夢羅浮好憑他
丹桂餘芬相伴忘憂三緯青細英早天點絳脣云纔得
春來曲闌西畔花無數鶯歌燕舞只道春長住○杜宇
頻啼已是春將去空凝伫漫天飛絮不見春歸處季若
綺絨英適太倉諸生王曦有餐楓館詞水仙疎影云瑣
窗清冷有仙姿綽約低傍妝鏡素靨盈盈玉骨玲瓏嫵

紅怎許相並。冰魂算與瓊樓遠。忍便入。等閑花徑。到夜
闌。明月飛來。簾底暗窺纖影。○還記深宮舊事。翠鬟愁
不整。塵夢初醒。故國雲迷。洛水依然。幽恨訴將誰省。珊
瑚休話。凌波步。怕前度。珮環難認。儘深深。銀蒜低垂。不
管曉來風勁。

聽秋聲館詞話卷二十

無錫丁紹儀杏舫

集句始自傅咸集十經詩明以來遂有專集唐詩杜詩者竹垞太史乃集古人成語爲詞蕃錦一編卓絕當時衆皆斂手至錢塘柴次山茂才才百一草堂詞咸集舊句成篇近日華亭張嘯峰廣文鴻卓更專意集詞組織之工幾欲突過前哲茂才憶王孫云看花多上水心亭。張夾岸桃花錦浪生。李楊柳陰陰細雨晴。武元白居遠遞高樓簫管聲。羅長相思云花參差。蘇星參差。易綠慘雙蛾不自持。步非春風能幾時。儲嗣○遙相

思。王勃暗相思。

白居易

只有妝樓明鏡知。

陳羽

相思每淚垂。

杜甫

廣文蝶戀花云殘酒欲醒中夜起。

馮延巳

銀漢無聲。

汪暉

滴寒如水。

盧氏

獨倚危樓風細細。

柳永

那堪玉漏長如歲。

蘇軾

○紅燭自憐無好計。

晏幾道

羅幙輕寒。

晏殊

點點殘花墜。

歐陽

修舊夢蒼茫雲海際。

詹正

無言劃盡屏山翠。

毛滂

廣文由貢

生官訓導著有綠雪館詞消夏清平樂云竹風敲玉雨

過天如沐。一箇涼蟬時斷續。滿地槐陰鋪綠。○石闌斜

傍芳池。田田低映漣漪。試問閑中清課。藕花香裏填詞。

遂取結語繪圖徵詩江駿叔云亂後尚無恙

詞家以入聲作平前人已詳言之其實不始於詞穆天

子傳云白雲在天邱陵自出道里悠遠山川間之是出
應讀如池亦有以平聲作上去二音者如滕子京臨江
仙前起云湖水連天天連水下連字應讀如斂又如杜
壽域漁家傲云疎雨纔收淡淨天微雲綻處月嬋娟寒
雁一聲人正遠添幽怨那堪往事思量徧○誰道綢繆
兩意堅水萍風絮不相緣舞鑑鸞腸虛寸斷芳容變好
將憔悴教伊見宋人漁家傲調均用仄叶此詞上用淡
兩月不兩上聲兩入聲字以代平聲則所叶四平聲俱
應讀作仄聲方協亦不自詞家始蔡邕郭有道碑上云
幾行其招下協保此清妙是招應讀如照至杜白二家

詩中拌讀如判十讀如謔琵琶讀如別茫讀如莽尤難悉
數故陳西麓日湖漁唱中往往平仄換叶如畫錦堂宋
詞俱用平韻而易以仄叶祝英臺近永遇樂絳都春宋
詞俱用仄叶而易以平韻渡江雲均於換頭第四句叶
一仄韻而一闕全用平叶一闕全用入聲西麓深於詞
者應如何移宮換羽而後不相凌犯其法惜已不傳近
人以意揣之仿爲新聲恐未必合耳

嚴修能明經

元照

居吳興而贅於吳流寓吾鄉最久中

年病歸僦居柯家山遂以名詞卜算子云淚眼鎮相看
分手渾無語門外分明見遠山山外知何處○雙槳載

愁來又送愁歸去。今夜紅閨夢裏人。獨聽孤蓬雨。思路
最爲深婉。餘亦輕倩。可諷相見歡。云斜陽只在樓西。暮
煙迷。一色長堤芳草。又萋萋。○春情嬾。春腸轉。翠眉低。
惆悵十年前事。再休提。點絳脣云。沉水熏殘。雁燈珠蠟
垂垂凍。更無人共。繡被春寒重。○多少相思。不合和愁
種。銀屏夢。月斜鐘動。做也成何用。祝英臺近云。悄寒輕。
晴晝永。特地捲珠箔。池上桃花。紅意已非昨。倚闌欲問。
東風吹開幾日。又何苦。將他吹落。○怨風惡。細算卻是
桃花。生來命原薄。隨意天斜。只合傍籬約。無端移近房
櫳。釀成春恨。悔當日。用心真錯。鷓鴣天云。淩亂殘英露

井東三更禁雨五更風。游絲苦要留春住。自向庭心
落紅。高閣靜。翠簾空。今年花事忒匆匆。花開還有明
年在。惆悵芳華逝水同。後二闕似爲悼其姬人香修作
明經歿時年甫中壽。今遺稿僅存尙未刊也。

歲乙卯余權汀州丞會長汀令延梅孫明府

棟

方與邑

紳士修縣誌。余謂藝文志中詩古文詞均宜選錄。不宜
以無關事實屏棄。蓋志文苑而不存其著述。未免夸誕。
無徵書未成。余已受代。越十年甲子。大兒承禧亦權汀
丞。已在兩罹兵燹。後甫逾月。逆匪又自江右竄陷甯化。
雖提師往勦。幸而克捷。然戎馬倉皇之際。誌之存否未

暇問也。近乃得之書肆。各家製撰。即附本傳後。體例似有未協。所采亦不甚純。第叔後殘編實賴以存存詞者。僅馬鑑泉司馬。廷萱一人而已。司馬由舉人官南河同

知西江。月云幾折雕闌斜繞。四圍斗帳低垂。露葵花放不多時。好箇嫩涼天氣。○新月微窺簷角。輕風悄颺簾眉。小鬟報道遠人歸。怪底銀缸雙穗。南樓令云川暝暮雲平。寒潮帶月生。渺江天一色空明。山外有山千萬疊。遮不斷。望鄉情。○風正片帆輕。中流自在行。謝姮娥。遠伴孤征。還想深閨眠也未。應屈指。數歸程。汀人均不講倚聲爲之。自司馬始。

浙詞多法姜張吳下則不然然究厥指歸不外竹山竹
屋數家昭文邵蘭風茂才

廣銓

所為詞於蔣尤近虞美

人云記得連番春夜雨。小樓翦燭同聽。玉肩斜。彈眼忪
惺。今生還未卜。偏要說來生。○一幅冰綃親付與。同心
結子瓏玲。細將辛苦苦叮嚀。繡成花一朵。數盡漏三更。
南浦云前約記分明。倚屏山。聽徹簷鈴聲碎。雪意正冥
濛。渾忘了一角斜陽鴉背。金猊香裊。何因結就雙雙穗。
驀地湘簾鉤細。還認玉釵敲墜。○本來弱不禁寒料
舉帷。定怯酸風吹袂。真箇不來時。生憎煞。昨夜燈花銀
蕊。平生細數。淒涼幾度消清淚。聽盡更籌盡酒。獨自

怎生成醉。祝英臺近云碧雲停紅豆撚金井。轆轤轉心
似春蠶縛向萬重繭。早知千種纏綿一般悵阻。倒不若
未曾相見。○尺書展。難道解語如花。不解意深淺。幾度
尊前擬把舊愁遣。卻憐放下眉頭。兜來心上。渾未信。并
刀能剪。茂才久遊京師。屢踏鎖闥。竟不獲一第。

江左鄭板橋大令

癸

兀鼻自喜書法如其人尤善畫蘭

至今片紙隻字爭相什襲。所著詩詞皆自選自刻。世人
亦多稱之。然如滿江紅云我憶揚州。便想到揚州。憶我
第一是隋堤。柳不堪煙鎖。潮打三更瓜步月。雨荒十
里虹橋火。更嬌紅零落不成圓。櫻桃顆。○何日向江村。

坐何日上江樓。臥賸詩人幾輩。酒人幾箇。花徑不無新
點綴。沙鷗頗有閑功課。笑白頭猶作折腰人。將無左語。
雖俊邁終非詞苑正宗。其治行則頗可稱。顧鮮有知者。
儀徵李艾塘三揚州畫舫錄言其官山左時有富家嫌
賸貧思逐之而懼涉訟不勝先以千金爲壽受之不辭。
並欲收其女爲義女富家喜甚乃密蓄其壻於官廨及
女入見卽出所受千金令其合卺挽車同歸。

南海譚玉生廣文

堂

樂志堂集中論詞絕句至一百七

十六首。挖揚間有未當如訾少游爲誰流下瀟湘去。謂
是常語。並謂白石舊時月色人何處。戛玉敲金擬恐非。

而推崇戴石屏與本朝之毛西河屈翁山謂屈詞足以

抗手竹垞此與番禺張南山司馬

維屏

服膺鄭板橋蔣

藏園詞同似門外人語內三十六首專論粵人如陳元

孝黎二樵詞均覓之未得余所見粵詞近推吳石華儀

墨儂爲最再則東莞林桓次侍讀

蒲封

齊天樂云十年

陳跡驚心認流鶯喜還未老海燕爭迎岸花曾送不分

者番重到且停蘭棹看幾樹垂楊向風低裊卻怪萋萋

池塘綠徧夢中草○琴絲暗塵浣了任吹殘鬢影誰是

同調虬漏聲沈魚天雲淡一抹眉痕纔掃紅樓深悄怎

話到前歡頓添悽抱回首南園曲闌春正好欽州馮魚

山戶部

敏昌

新構小亭落成天仙子云結就小亭形似

舸。泉石周遮叢竹裏。漁歌斷處接樵歌。斜日墮浮雲破。
對影三人風月我。○老去心情耽嬾惰。怕向危流重振
杙。竭來宴憩意悠然。閒吟坐。饒清課。讀畫絃詩無不可。
高要黃琴山太守德峻留別友人金縷曲云別緒因君
起。覺朝來陽關未唱。寸心先碎。十載風塵牛馬走。僕亦
幾經愁死。賸草草勞人若此。脫屣妻孥都易事。到他鄉
愈戀眞知己。悽無語。可知矣。○行程忽又趨燕市。指關
山暮雲春樹。八千餘里。何日萍踪能再合。後會良難預
擬。只只素遠憑雙鯉。倘對惠連懷謝客。願夢魂時入西

堂裏言不盡。此中意。番禺陳蘭甫孝廉禮朝雲墓八聲。

甘州云。漸殘陽。淡淡下平蕪。塔影浸微瀾。問秋墳何處。
荒亭葉瘦。斷碣苔斑。一片零鐘碎梵。飄出舊禪關。杳杳
松林外。添做蕭寒。○不恨竹根常臥。勝丹成遠去。海上
三山。只一坏香塚。占取小林巒。依約傍水仙祠廟。有西
湖如鏡照華鬢。休腸斷。玉鴛煙雨。謫墮人間。林有鼇洲
集附詞。黃有三十六鴛鴦館。詞顧詩中均無一言論及。
殆以爲近時人耶。二樵亦近時人也。殊不解。

瑯亭旅館雖多惡札。亦間有佳什。先祖西園瑣述云。
昔經山右張蘭鎮。見旅壁題詞。調寄鵲踏枝云。簾外曉。

寒風力悄。欲換羅衣。尙怯春光早。剛著柳梢新綠到。弄晴枝上聞啼鳥。○怪煞紫騮嘶漸杳。試問金鈴。護得花多少。一樣春眠偏易覺。輸他小妹忘春曉。字極秀媚。不知何人所作。余昔在河南郭店驛。見壁間無名氏長相思云。小樓西。小橋西。千縷垂楊綠未齊。盡眉枝畔啼。○草盈堤。水平堤。拾翠人歸夕照低。春衫溼燕泥。又有女子題詩並序云。妾維揚貧家女也。幼侍李矩香夫人。伴讀。今春夫人隨宦九江。遣妾歸。詎奈雙親愛。媒氏誑。竟以十金鬻妾於長安賈良人。年將周甲。腹少一丁。朝夕相看。默無一語。嗚呼。此身已污。夫復何言。不知前世何

慙受此無窮罪業肝腸寸斷血淚併流聊賦俚言用舒
鬱結良人在側尙問作何生活云輕謫塵寰暗自憐誤
人幻夢小遊仙如弓明月初三夜似箭春風十七年屋
縱黃金傷不偶玉非白璧恨難蠲無端竟屬沙叱利並
少韓郎若箇邊怕泛鄱陽浪裏船誰知從此隔秦川心
驚路遠三千里命薄身隨一萬錢恨不疎頑同白腹悔
曾閨閣理丹鉛被他花蕊夫人笑旅壁權充十樣箋又
見楚北小溪旅舍壁懸小軸書一詞云風過處習習野
花香獨立溪橋望雲隨流水忙按調爲閑中好書法頗
佳無款識止圖章一方已爲煙煤熏浣不復可辨

余久聞長樂梁韻書女史蓉函工填詞覓其稿未得近

見紫霞軒詩附詞爲閩縣諸生魏鵬程室盧倩雲女史

藕貞

著春暮有感鋸解令云朝來幾陣催花雨早柳絮

風前亂舞。瑤箏試理十三絃。漫彈出。閑愁無數。○呢喃

燕語。多少離懷待訴。玳梁未改舊巢存。卻爲底。飛來又

去。女史失所。天後四子均早夭。無嗣僅一寡媳。親族無

可依。現爲女學究。自贍垂老。此倚有足悲者。

康熙中吾鄉有兩處士。均夫婦工詩。遁跡圜足。不踐

城市。一爲楊紫淵。

維甯

築室管社山。意不在詩文所作。

隨手散棄。存詩一卷而已。一爲李嬾仙。

崧

居嘯傲。涇有

夕陽邨詩浣香詞臨江仙云夢裏尋春春不見依稀綠
樹紅亭煙深月冷欠分明梨花深院靜燈暗細搗箏○
指上心頭多少怨倩風訴與誰聽越無聊處越淒清蒼
苔忘路滑背手獨閒行踏莎行云心燄未灰情絲如織
禁他雪壓瓊枝白忍寒玉甲弄琵琶梨花院靜鶯聲澀
○筆銳針尖墨濃黛色紅冰淚漬鮫綃溼薛濤牋短奈
情長欲書一字終無得其室薛素儀瓊有絳雪詞慰閨
友病起南歌子云雀舌難消渴蝦鬚不閉寒落花風起
更尖酸薄薄羅衫休傍小闌干○煮藥忘寒食熏香犯
禁煙乍晴門巷賣餚天檢點精神同步看秋千

嬾仙同時有陳集生布衣

大成

家無儋石而性喜結客

恒質衣沽酒爲樂著有樹影樓詞菩薩蠻云蓮塘雨過
花開徧水亭長日張清宴曾記有人同臉霞相映紅○
今宵重聽雨藕斷蓮心苦盼得再花開箇人來不來臨
江仙云幾陣西風聲簌簌漸聽響徹疎林天涯葉葉灑
輕陰亂烏樓月冷孤雁唳雲深○一自長亭分手去紅
箋沒箇回音花前憔悴到如今幾曾開寶鏡空待熨香
衾均不失秋水矩矱

長洲王二波騎尉

嘉福

清平樂云輕衫窄袖春向眉峰

逗悄立瑤階衣略縐人與梅花同瘦○何須淺笑深顰

相期不負芳春。道是今生薄命。可知明月前身。上元車

子。尊明經。

持謙

爲秦淮女校書。袖珠題水仙。畫冊聲聲。

慢云影迴洛浦。香暗江皋。珊珊來者。其仙記得相逢。瑤

臺第幾重天。香風數過。

平聲

廿四。只無由。數到伊邊。好珍

重。玉玲瓏仙骨。拾翠調鉛。○聽說封姨跋扈。已石家衣

浣。陶氏鬢偏。料理青瑩。不須鈴索高懸。今生雪霜耐盡。

認前身。明月嬋娟。月明也。悄淩波。湘夢再圓。用意略同。

而措語不同。各極其妙。騎尉爲詩人。鐵夫廣文。

芭孫

子

出嗣。乃叔襲世職。未任卒。明經一字秋舫。著有捧花樓

詞。其分題咏古得臨春閣玲瓏四犯筆致尤韶秀。詞云

閣迴臨春已香散沉檀重問無地銅狄摩挲轉恨奈何
爲帝聞說複道凌空可望見攔江千騎悔不如狎客裁
箋曲曲朱闌都倚○後庭傳出君王製譜新聲麗華能
記念家山破柔腸斷消受此間曾幾憑待夢醒雞臺等
是一般興替剩多情璧月還省識年時事

閨中妝飾如脂粉衫裙等類詞人每寄之賦咏獨衣紐
羌無故實未有咏者近見錢塘張仲雅明府

雲璈

三影

閣箏語中有是題調寄沁園春云閉翠緘紅恰比相思
重重不寬正半圍繡領餘香空戀一痕寶袜春色長關
褪卻嫌鬆整時偏緊多在酥胸粉項間眠初起尙羅襦

小袒好夢闌珊。○分明莫解連環。更密密排來雁柱單。
似門銜屈戌。鎖殘芳怨。牕封了鳥。約住輕寒。碧玉如丸。
黃金作蒂。帶結綢繆。擬共看。風懷露笑。漢宮窮袴。著意
防閒。明府詩以簡松堂名。意在宗法袁簡齋趙雲松二
家。當袁趙盛時。人趨若鶩。歿未十年。無不反脣相稽。幾
不容於壇坫中。分一席地。明府詩不類二家。顧取以名
堂。殆有慨於儼薄之徒。故爲是矯情舉耳。

南滙張培山明府

朱梅

聽兩山房詞中分咏環釧沁園

春一闋亦纖穠。可喜耳環云雪樣。纖瓊巧綰低垂。如侵
玉樓。愛明璫綴處。彩燈般墜。紫磨研就。弦月般鈎。勻面

窗前釵妝奩畔。微費工夫脫復勾。菱花鏡照兩邊流睸。
慣是梳頭。○笑酣爲戲同游。共釵燕簪花顛未休。看關
情細聽。雙懸不動。敲肩密語。半面黏留。閒整蝸蟻。輕撩
蟬鬢。不道春尖偶意兒。增嬌媚。恁難如瓔珞。端正風流。
腕釧云。憶過樓頭。紅粉招時。團團袖閒。想舞如迴雪。雙
枝旋轉。別來掩涕。兩袖遮函。子建裁詩。仲宣作賦。皓腕
鍾情不等閒。曾摹擬。似鏤空圓月。解散連環。○有時攔
在闌干。憐肌上新痕。隱隱丹怕未工。懸筆頻磨繭紙。每
當倦枕。低壓雲鬢。攀樹流光。欠伸縱體。微褪應知比帶
寬。閒窗下。任較量肥瘦。頻約中關。
原註醫家以又嘉興關脈爲中部

項朱樹茂才

映薇

賦指彊剔銀燈云翡翠金彊約指。小

字潘郎親製。接續無痕玲瓏一色。可似心連情締。春蔥
眞細。嫌寬否。帶來第四。○暗想朝盤錦髻。幾許粉黏脂
膩。浴手銅盆。那曾輕卸。片刻也難拋棄。繡針停刺。怕女
伴孜孜偷視。可云巧不傷雅。茂才有桐花館詞。其落葉
聲水龍吟尤佳。詞云捲來一片酸風。蕭蕭槭槭驚難住。
輕猜點屐。急疑敲戶。碎同飄雨。墮瓦琤琮。鋪階瑟瑟。穿
籬飛舞。怕秋聲不到。珠簾繡幙。偏吹近樓深處。○側耳
霜砧幾杵。又攪和。鳥啼蛩訴。煙花似夢。繁華都盡。結成
淒楚。渭水寒生。洞庭波起。帶愁流去。記燈殘吟倦。小窗

對客黯然無語。

周公謹齊東野語錄蜀中妓送行詞云欲寄意。渾無所有。折盡市橋官柳。看君著上征衫。又相將。放船楚江口。○後會不知何日。又是男兒。須要鎮長相守。苟富貴。無相忘。若相忘。有如此酒。後人卽取詞中市橋柳。爲調名詞綜詞律均采之。近見永樂大典中集出王質雪山集內有送邵倅紅窗怨云欲寄意。都無有。且須折贈市橋官柳。看君著上征衣。也尋思。榜舟楚江口。○此會未知何日。又恨男兒。不長相守。苟富貴。無相忘。若相忘。有如此酒。按紅窗怨調宋人無有填者。詞譜詞律亦均未收。

其詞與市橋柳雖字句稍有不同而語意則一雪山曾
爲蜀中幕僚豈好事者點竄數字僞爲蜀妓作耶抑竟
不謀而同耶

乾嘉以來王田生詞風行海內獨家若士大令

履恒能

窺其奧如咏雁疏影云暗蛩吟斷又長空嘹唳數陣驚
雁拋卻梁州銜盡寒蘆猶帶塞聲淒怨羅浮夢醒君歸
去那正好草明香暖怎知余小別經年已把鬢華偷換
○想爲金飈漸勁怕冰雪嚴凝來寄湘岸瘦影聯翩還
喜攜群小聚圓沙低暗和煙冷抱蒹葭宿早消盡濃霜
片片甚東風吹入江南還向塞垣飛遠高陽臺云燼落

荷燈水沉蓮漏涼風已度輕裯。庭院淒涼。暗蛩鳴咽牆
根。不如卻下簾兒坐。又敲窗。亂葉紛紛。任鑪薰攪入新
愁。不甚氤氲。○清宵本是多惆悵。况征鴻信杳。目斷行
雲。料得新蟾。如今也到重門。無聲露溼羅衣薄。恐斑斑
難認。啼痕。倚黃昏。幾曲闌干。幾度銷魂。不僅虎賁中郎
貌似而已。大令家武進官肥城。令有宛芳樓詞。

詞宜尙雅。始自曾端伯手編樂府以雅詞名。顧所選有
不盡然者。如顏博文西江月云。草草書傳錦字。慊慊夢
繞梅花。海山無計駐仙槎。腸斷芭蕉影下。○缺月舊時
庭院。飛雲到處人家。而今贏得鬢先華。說著多情已怕。

又無名氏望遠行云當時雲雨夢不負楚王期。翠峰中。
高樓十二掩瑤屏。儘人間歡會。只有兩心自知。漸玉困
花柔。香汗揮。○歌聲翻別怨。雲馭欲回時。這無情紅日。
何似且休西。但涓涓珠淚。滴溼仙郎羽衣。怎忍見雙鴛
相背飛。頗似柳七黃九語。又如李敦詩卜算子云南北
利名人。常恨家居少。每到春時聽子規。無不傷懷抱。○
好去向長安。細與公卿道。待得功成名遂時。何似歸來
早。殊淺陋無味。

元劉起潛堽隱居通議錄張自明觀邸報詩云西風颯
颯雨蕭蕭。小小人家短短橋。獨倚闌干數鷺匹。一聲孤

雁在雲霄言見者多不解一士人獨太息曰此詩興致高遠其旨不難見也蓋風雨蕭颯言國事日非小小人家言建都一隅短短橋言之濟時長策數驚匹言所用皆卑污之徒雁在雲霄言賢者遠舉當時必有君子去國故爲是語耳余謂詩意必如此詮釋方顯亦太隱矣然作者不宜如此讀者不可不如此體會因思南宋末季士多憫世遺俗託興遙深如蔣竹山解珮令云春晴也好春陰也好著些兒春雨越好春雨如絲剛繡出花枝紅裊怎禁他孟婆合皂○梅花風小杏花風悄海棠風驀地寒峭歲歲春光被二十四風吹老楝花風爾且

慢到。祝英臺近云柳邊樓。花下館。低捲繡簾半。簾外游
絲。擾擾似情亂。知他蛾綠纖眉。鵲黃小袖。在何處。閑遊
閑玩。○最堪歎。箏面一寸塵深。玉柱網斜雁。譜字紅蕩。
翦燭記同看。幾回傳語東風。將愁吹去。怎奈向。東風不
管。與德祐太學生百字令詞真箇恨煞東風同一意旨
彼天下事問天怎忍如此與縱使一邱添一畝也應不
似舊封疆及但把科場鬧秀才未必調羹用許多等語
未免直率竹山又有句云斷腸不在分襟後原來在襟
未分時當是入元後作蓋北宋之禍始於安石之喜更
張南宋之亡誤於似道之講綜覈竹山追念亂所由起

既往莫咎故託諸閨檐兒女慨乎言之

烏程范白舫明經

錯

原名音橐筆依人好作古字著有

茗溪漁隱詞點絳脣云永夜輕寒鏡臺慵翦燈花墜蜀
牋光膩學寫相思字○煙水迢迢欲寄憑誰寄春來事
滿林紅翠只有人憔悴鵲橋仙云飄零書劍清狂詩酒
不信相如遊倦憑闌鎮日意恹恹生怕聽一聲征雁○
愁無人覺病無人問靜掩朦朧深院并梧初放月痕來
又早被西風吹亂登晴川閣水龍吟云幾回高閣登臨
怒濤聲裏流年急西風弔古有人指點禹王功跡浪鎖
支祁碑摹嶽麓遺祠虛寂望隔江黃鶴白雲樓外仙人

去誰橫笛。○笑我飄零。劒笈滿征塵。欲歸未得。荆襄烽火。羽書飛處。星馳津驛。贏得天涯。依劉王粲。淚沾胸臆。但危欄獨倚。斜陽一片。照秋岑碧。其所著攬茝山房漫記。閒附明季遺聞。言崇禎間。楚師擒賊。闖場天火。眼怪異。詰之云。日食人心一具。已食五千餘矣。又言漢陽諸郡。先時盛行驚掌庖人。煨地極紅。促驚履其上。須臾。掌腫加倍。驚渴甚。飲以醯醬。乃斷其掌。爲上品宴客。非此爲不敬。後流賊張獻忠至。斷男女手足如岡。阜名以金蓮玉臂峰。舉火焚之。人以爲食。驚之報明。經客楚最久。時川楚教匪方熾。而官民尙不知以惠養生命爲意。肆

行殘刻漫記所述殆有感於時事云

堦鍾保元校字

今使珊瑚插架盡然脂弄墨之資翡翠盈箱祇錯采鏤
金之作言無關於考證義不主於闡揚縱復譜古調以
成聲藉曼音而通志八义製麗徒騁妍姿四遠詞新僅
資談助抑知歌風弔月姑付諸桓笛秦簫蕩氣迴腸且
聽彼吳歛越調翻香山之樂府半屬諷時測朱王之賦
心豈真好色此外舅杏船公詞話所由作也公弱不好
弄長更博聞學三代文詞作五經鼓吹讀蕭何之律目
一覽而無遺荅齡石之書日百函以立就洎捧毛生之
檄屈乃爲親試裁潘令之花仕不廢學政成三月花咲
無驚獄折片言鼠牙盡息方冀強臺日上重刊峴首之

碑旋因鄂渚風回更擊聞江之楫時也紅羊劫換青犢
災生綠林鷗張黃巾豕突傳修期才高倚馬恒磨盾鼻
以成書陶士行奮不顧身致隕胡奴於臨陣迨向上洋
而判刺適逢羣寇之紛來公則叱馭而行橫刀而誓渡
口麾顧榮之扇一旅成功城頭吹越石之笳四郊永靖
作偏隅之保障遂獨奏此奇勲殲醜類於行間宜懋膺
夫上賞乃以戮揚干之僕怒起晉侯誅令公之兵燹生
老卒法行自近雖興臺咸懾威名時思中傷詎大府偏
憎強項謂下吏敢於傲上恃其是而清議爲淆謂文員
例不典兵坐以巧而彈章遽發此固數奇不偶良由才

大難容也不見夫衮衮登場躊躇逐隊六韜嫻未便欲
請纓半綬分將輒思投筆後來居上爭誇折衝尊俎之
才耦俱無猜不少心腹干城之選公旣一官甌墮三徑
松孤橫被罡風未鬱者青霞之氣競歇下里寡和者白
雪之音遂乃延攬煙蘿範模山水探勝景於釣龍臺畔
閒聽南浦潮聲暢靈襟於眠鶴亭邊默數西窗雨點埋
愁無所聊放浪於酒旗戲鼓之間忍俊不禁長嘆喑於
殘月曉風之下端居多暇契古何深冀追媿夫前賢復
倦懷夫時彥心波湛湛慨思遠紹旁搜劫火星星掇拾
零章剩句寄人往風微之感獨具遙情寓針砭儒之

思別開生面紅鹽白紵悉供揮麈清談鐵板銅琶兼助
當筵豪興二十卷詞華薈萃便成文苑之奇觀數百年
詞旨源流盡入騷壇之佳話且夫文話推原於劉勰詩
話託始於鍾嶸都京乃古詩之流孫梅旁通夫衆說駢
儷是才人之筆王銍博采爲美談溯倚聲肇自青蓮間
妙解誰如白石在昔西河毛氏雖有詮評南宋楊君非
無傳述靈芬別館郭頻伽才調斐然詞苑叢談徐檢討
聲華籍甚然皆簡篇未富或且辨論未精惟茲彙集巨
編實足範圍後學補詞綜之闕博覽詳稽正詞律之譌
辨同證異網羅散佚考遺聞於唐宋元明採擷菁英蒐

軼事於東西南朔詩人之辭麗以則均有指歸春秋之
義婉而明可通比興哀絲豪竹中年自寫其胸懷豔語
清詞大旨必原於風雅倘謂閒情撥觸置其然乎須知
託興遙深是之取爾鑑少而失學慚非玉潤之儔壯不
如人忝是微雲之壻貳室渥叨夫殊遇千金復資以遠
遊幸釋褐於燕臺學製錦於粵海追隨五載同王粲之
依人離別十年憶荊州之識我愧乏姜張雅致未解偷
聲得聆朱厲緒言猶思按譜觀乎止矣將有感於斯文
讀者誰與尙深明夫厥旨子壻胡鑑衡齋謹跋